




ILMU SIRAH

OBJEKTIF KURSUS KESELURUHAN:

- a) **Mengenali dan memahami peristiwa-peristiwa penting dalam sejarah Islam** termasuk wahyu pertama, peristiwa hijrah, peperangan utama, dan peristiwa-peristiwa lain yang membentuk asas perkembangan Islam.
- b) **Memahami tentang strategi dakwah dan strategi peperangan yang digunakan oleh Rasulullah SAW** yang memainkan peranan penting dalam pengukuhan dan penyebaran Islam.
- c) **Mempelajari tentang pengorbanan besar yang dilakukan oleh Rasulullah SAW dan para sahabat dalam usaha menyebarkan Islam** termasuk cabaran, penderitaan, dan reaksi masyarakat Mekah terhadap dakwah Islam.
- d) **Mendalami impak peristiwa-peristiwa utama** seperti Israk dan Mikraj, Bai'ah Aqabah, dan pembukaan Mekah terhadap perkembangan dan pengukuhan negara Islam, serta bagaimana peristiwa-peristiwa ini membentuk asas keimanan dan kesatuan umat Islam.
- e) **Membantu peserta mengambil iktibar dan mengaplikasikan nilai-nilai** seperti ketabahan, ketaatan, kebijaksanaan, dan perpaduan dalam kehidupan mereka berdasarkan pengajaran daripada Sirah Nabawiyah.

SESI PERTAMA

PERMULAAN WAHYU SEHINGGA HIJRAH KE HABSYAH

1. HASIL PEMBELAJARAN:

- Memahami peristiwa-peristiwa awal dalam sejarah Islam.
- Mengenali pengorbanan Rasulullah SAW dan para sahabat dalam menyebarkan Islam.
- Menganalisis strategi-strategi dakwah yang digunakan oleh Rasulullah SAW dalam menyebarkan Islam, serta reaksi masyarakat Mekah terhadap dakwah tersebut.
- Memahami kesan hijrah ke Habsyah terhadap keselamatan dan kelangsungan dakwah Islam di peringkat awal.

2. ISI KANDUNGAN UTAMA:

- Pendahuluan
- Wahyu Pertama Diturunkan kepada Rasulullah SAW
- Dakwah secara Sembunyi & Terang-terangan
- Reaksi Terhadap Dakwah Awal di Mekah
- Hijrah ke Habsyah
- Penutup

WAHYU PERTAMA DITURUNKAN KEPADA RASULULLAH SAW

Kisah Rasulullah SAW Beruzlah

Menjelang Nabi SAW berusia 40 tahun, Nabi Muhammad SAW mula merasakan dorongan yang kuat untuk melakukan 'uzlah (menyendiri). Allah menumbuhkan rasa suka dan ketenangan dalam dirinya untuk berikhtila' (menyendiri) di Gua Hira', sebuah gunung yang terletak kota Makkah. Di tempat yang sepi ini, Baginda menyendiri dan beribadah, menjauh daripada kesibukan dan hiruk-pikuk kehidupan kota.

Ketenangan dan kedamaian yang Baginda rasakan dalam kesendirian ini membuatnya terus kembali ke Gua Hira'. Setiap kali bekalan habis, Baginda pulang ke rumah untuk mengambil bekalan baru dan kemudian kembali lagi ke gua untuk meneruskan ikhtila'nya.

Kegiatan ini berterusan sehingga pada suatu saat yang telah ditentukan Allah, wahyu pertama turun kepada Nabi Muhammad SAW. Kejadian ini menandakan permulaan misi kenabiannya dan merupakan titik penting dalam sejarah Islam. Wahyu pertama yang turun ketika Baginda sedang dalam 'uzlah ini menegaskan kepentingan momen penyendirian tersebut sebagai persiapan rohani bagi tugas besar yang akan diembannya sebagai Rasul Allah.

Tempoh 'uzlah Nabi Muhammad SAW di Gua Hira' ini menunjukkan betapa pentingnya refleksi dan penyendirian dalam kehidupan rohani seseorang. Hal ini juga menjadi bukti bagaimana Allah mempersiapkan nabi terakhir-Nya untuk menerima wahyu dan menjalankan misi kenabiannya. Melalui contoh ini, umat Islam diajarkan untuk mencari ketenangan dan kedekatan dengan Allah dalam kesendirian, sebagai salah satu cara untuk memperkuat iman dan mendapatkan petunjuk-Nya.

Wahyu Diturunkan kepada Rasulullah SAW

Ketika Nabi SAW mencapai usia 40 tahun, Jibril datang membawa wahyu kepada Baginda. Peristiwa ini berlaku pada hari Isnin, 17 Ramadan. Ini adalah sebagaimana hadis Rasulullah SAW:

Dalam al-Quran, Allah SWT menjelaskan tentang akhlak Rasulullah SAW menerusi firman-Nya:

أَوَّلُ مَا بُدِيَ بِهِ رَسُولُ اللَّهِ صَلَّى اللَّهُ عَلَيْهِ وَسَلَّمَ مِنَ الْوَحْيِ الرُّؤْيَا الصَّادِقَةُ فِي النَّوْمِ؛ فَكَانَ لَا يَرَى رُؤْيَا إِلَّا جَاءَتْهُ مِثْلَ فَلَقِ الصُّبْحِ، فَكَانَ يَأْتِي حِرَاءَ فَيَتَحَنَّنُ فِيهِ -وهو التَّعَبُّدُ اللَّيَالِي ذَوَاتِ الْعَدَدِ- وَيَتَرَوَّدُ لَذَلِكَ، ثُمَّ يَرْجِعُ إِلَى خَدِيجَةَ فَتَرْوِدُهُ لِمِثْلِهَا، حَتَّى فَجَأَهُ الْحَقُّ وَهُوَ فِي غَارِ حِرَاءٍ، فَجَاءَهُ الْمَلَكُ فِيهِ، فَقَالَ: اقْرَأْ، فَقَالَ لَهُ النَّبِيُّ صَلَّى اللَّهُ عَلَيْهِ وَسَلَّمَ: فَقُلْتُ: مَا أَنَا بِقَارِيٍّ، فَأَخَذَنِي فَغَطَّنِي حَتَّى بَلَغَ مِنِّي الْجَهْدُ، ثُمَّ أَرْسَلَنِي فَقَالَ: اقْرَأْ، فَقُلْتُ: مَا أَنَا بِقَارِيٍّ، فَأَخَذَنِي فَغَطَّنِي الثَّانِيَةَ حَتَّى بَلَغَ مِنِّي الْجَهْدُ، ثُمَّ أَرْسَلَنِي فَقَالَ: اقْرَأْ، فَقُلْتُ: مَا أَنَا بِقَارِيٍّ، فَأَخَذَنِي فَغَطَّنِي الثَّلَاثَةَ حَتَّى بَلَغَ مِنِّي الْجَهْدُ، ثُمَّ أَرْسَلَنِي فَقَالَ: {اقْرَأْ بِاسْمِ رَبِّكَ الَّذِي خَلَقَ} حَتَّى بَلَغَ {عَلَّمَ الْإِنْسَانَ مَا لَمْ يَعْلَمْ} [العلق: 1-5]

Ertinya: “Perkara pertama yang mula-mula berlaku kepada Rasulullah SAW ialah mimpi baik semasa tidur. Baginda hanya bermimpi melihat ia datang seperti cahaya subuh. Kemudian, ditimbulkan kepada Baginda rasa cinta untuk berkhulwah (bersendirian). Baginda berkhulwah di Gua Hira. Baginda beribadat di dalamnya untuk beberapa malam sebelum pulang menemui keluarganya bagi mengambil bekalan untuk khulwah seterusnya. Kemudian, Baginda kembali menemui Khadijah, mengambil bekalan yang seumpamanya. Sehingga wahyu kebenaran diturunkan kepada Baginda ketika berada di Gua Hira. Malaikat (Jibril) datang menemui Baginda seraya berkata, “Bacalah.” Baginda berkata, “Aku tidak tahu membaca.” Baginda menceritakan, “Maka dia memegang dan menutupi aku sehingga aku berasa kepenatan. Kemudian dia melepaskan aku. Dia berkata lagi, ‘Bacalah.’ Maka aku berkata, ‘Aku tidak tahu membaca.’ Maka dia memegang dan menutupi aku untuk kali kedua sehingga aku berasa penat. Kemudian dia melepaskan aku.’ Dia berkata kembali, ‘Bacalah.’ Maka aku berkata, ‘Aku tidak tahu membaca.’ Maka dia memegang dan menutupi aku untuk kali ketiga. Kemudian dia melepaskan aku seraya membaca Surah al-Alaq ayat 1-5”

(Hadis Riwayat Bukhari dan Muslim)

Setelah itu, Rasulullah SAW pulang dengan perasaan yang sangat cemas dan menggigil. Baginda menemui Khadijah binti Khuwailid r.h.a. dan berkata, “Selimuti aku, selimuti aku.” Khadijah segera menyelimuti Baginda sehingga ketakutan Baginda reda. Rasulullah kemudian menceritakan kejadian yang berlaku dan berkata, “Aku bimbang akan diriku.”

Reaksi Rasulullah SAW Selepas Menerima Wahyu

Khadijah lantas menenangkan Baginda dengan berkata, “Tidak mungkin, demi Allah, Allah tidak akan sesekali menghinamu. Engkau menjaga hubungan kekeluargaan, membantu yang lemah, menyediakan rezeki bagi yang tidak berkemampuan, memuliakan tetamu, dan menolong mereka yang memerlukan bantuan.”

Peristiwa ini menggambarkan ketakutan awal Rasulullah SAW ketika menerima wahyu pertama serta sokongan dan keyakinan yang diberikan oleh Khadijah r.ha. kepada Baginda.

Pertemuan dengan Waraqah bin Naufal

Khadijah membawa Rasulullah SAW menemui sepupunya, Waraqah bin Naufal, yang merupakan seorang penganut Nasrani dan boleh menulis dalam bahasa Ibrani. Waraqah mendengar cerita Rasulullah SAW dan menyatakan bahawa Jibril yang muncul kepada Baginda adalah Namus (pembawa wahyu) yang pernah turun kepada Nabi Musa a.s. Waraqah juga meramalkan bahawa kaumnya akan mengusir Baginda. Tidak lama selepas itu, Waraqah meninggal dunia dan wahyu terhenti untuk sementara waktu.

Terhentinya Wahyu untuk Sementara

Setelah menerima wahyu pertama, wahyu terhenti untuk sementara waktu. Berlaku perselisihan riwayat tentang tempohnya. Yang paling lama ialah tiga tahun dan paling singkat ialah enam bulan. Riwayat enam bulan itulah yang sahih. Ketika wahyu terhenti, Rasulullah SAW berasa sangat dukacita dan hampir-hampir ingin menghancurkan diri dari puncak bukit.

Baginda menyangka Allah telah membencinya setelah memilihnya untuk tugas risalah yang mulia. Selepas itu, wahyu kembali turun kepada Baginda, sebagaimana yang diriwayatkan oleh al-Bukhari dalam kitab.

Ketika tempoh terputusnya wahyu, Rasulullah SAW merasa susah hati dan amat dukacita, sehingga Baginda hampir-hampir keluar ke kawasan bukit dan ingin menghancurkan diri daripada puncaknya.

Nabi SAW berkata, “Ketika aku sedang berjalan-jalan, tiba-tiba aku mendengar satu suara daripada langit. Aku mengangkat pandanganku. Rupa-rupanya ia adalah malaikat yang telah datang kepada aku di Gua Hira'. Malaikat itu sedang duduk di atas kerusi di antara langit dan bumi. Aku berasa takut kepadanya, lantas aku pulang. Aku berkata, ‘Selimutkan aku.’”

DAKWAH SECARA SEMBUNYI DAN TERANG-TERANGAN

Pada permulaan, Nabi Muhammad SAW menjalankan dakwah secara sembunyi-sembunyi. Tempoh ini berlangsung selama tiga tahun dan bertujuan untuk menyampaikan ajaran Islam kepada individu-individu yang dipercayai. Dakwah secara rahsia ini dilakukan untuk menghindari penentangan awal yang mungkin mengancam keselamatan dan keberhasilan penyebaran Islam.

يَا أَيُّهَا الْمُدَّثِّرُ (1) قُمْ فَأَنْذِرْ (2)

Ertinya: *"Wahai orang yang berselimut! Bangunlah serta berilah peringatan dan amaran (kepada umat manusia)."*

(Surah Al-Muddathir ayat 1-2)

Pada waktu itu, kaum Nabi Muhammad SAW tidak mempunyai keyakinan yang teguh dan hanya mengikuti tradisi nenek moyang mereka. Dakwah secara sembunyi-sembunyi dilakukan oleh Rasulullah SAW supaya penduduk Makkah tidak terkejut dengan ajaran yang tiba-tiba muncul dan menggusarkan mereka.

Rasulullah SAW memulakan dakwahnya dengan menyampaikan kepada keluarganya terlebih dahulu. Orang-orang yang percaya kepada Rasulullah SAW dan memeluk Islam yang terawal atau dikenal sebagai *as-sabiqunal awwalun*.

Rasulullah SAW memilih tempat-tempat yang tersembunyi dan aman untuk berkumpul dengan para sahabat yang awal memeluk Islam. Rumah al-Arqam bin Abi al-Arqam merupakan salah satu markas penting di mana Rasulullah SAW membacakan ayat-ayat al-Quran dan mengajar para sahabat tentang agama Islam.

Setelah bilangan umat Islam meningkat kira-kira 30 orang, Allah memerintahkan Rasulullah SAW untuk menyampaikan dakwah secara terang-terangan. Firman Allah dalam surah al-Hijr ayat 94 menyatakan:

فَاذْعُ بِمَا تُوَمَّرُ وَاعْرِضْ عَنِ الْمُشْرِكِينَ

Ertinya: *"Oleh itu, sampaikanlah secara berterus-terang apa yang diperintahkan kepadamu (wahai Muhammad), dan janganlah engkau hiraukan bantahan dan tentangan kaum kafir Musyrik itu."*

(Surah al-Hijr: ayat 94)

Menurut tafsir daripada Abdullah bin Ubayd berkata Nabi Muhammad SAW bersembunyi sehinggalah turun ayat ini, kemudian Baginda keluar bersama para sahabatnya.

Rasulullah SAW memulakan dakwah terang-terangan dengan mengumpulkan kerabat terdekatnya daripada kalangan Bani Hasyim dan Bani al-Muthalib bin Abdi Manaf. Baginda menyampaikan tentang pentingnya beriman kepada Allah dan azab yang menanti bagi mereka yang bermaksiat. Dalam pertemuan ini, Abu Lahab menjadi orang pertama yang menentang, sementara Abu Talib menyatakan sokongan untuk melindungi Baginda, meskipun tidak memeluk Islam.

Orang pertama yang beriman dan memeluk Islam ialah Khadijah r.ha., diikuti oleh Ali bin Abi Talib yang masih kanak-kanak, Zaid bin Harithah, dan Abu Bakar as-Siddiq. Bilal bin Rabah al-Habsyi merupakan hamba sahaya pertama yang memeluk Islam.

Setelah yakin dengan perlindungan Abu Talib, Rasulullah SAW naik ke Bukit Shafa dan memanggil seluruh suku Quraisy. Baginda menyampaikan seruan untuk beriman kepada Allah dan hari akhirat. Ketika Abu Lahab mencelanya, turunlah ayat yang mengutuk Abu Lahab:

تَبَّتْ يَدَا أَبِي لَهَبٍ وَتَبَّ

Ertinya: "Binasalah kedua-dua tangan Abu Lahab dan sesungguhnya dia akan binasa."

(Surah al-Masad: ayat 1)

Peristiwa ini menandakan permulaan dakwah secara terang-terangan kepada masyarakat umum di Makkah. Kemudian, Allah memerintahkan Rasulullah SAW untuk lebih meluaskan dakwahnya:

فَاَصْدَعْ بِمَا تُؤْمَرُ وَاعْرِضْ عَنِ الْمُشْرِكِينَ

Ertinya: "Maka sampaikanlah olehmu secara terang-terangan segala apa yang diperintahkan (kepadamu) dan berpalinglah daripada orang-orang yang Musyrik."

(Surah al-Hijr: ayat 94)

Rasulullah SAW kemudian menyampaikan dakwah kepada kabilah-kabilah lain, tempat-tempat berkumpul dan pertemuan kaum Musyrikin. Dakwah Baginda mendapat sambutan daripada sebahagian orang, tetapi juga penolakan dan penentangan yang keras daripada yang lain, terutama daripada para pemimpin Quraisy yang berasa terancam dengan ajaran baru yang dibawa oleh Baginda.

REAKSI TERHADAP DAKWAH AWAL NABI MUHAMMAD SAW DI MEKAH

Reaksi terhadap dakwah awal Nabi Muhammad SAW di Mekah diwarnai dengan pelbagai penderitaan dan penyeksaan yang dialami oleh para pengikut awal Islam. Orang-orang Quraisy yang berasa terancam oleh ajaran tauhid yang dibawa oleh Nabi Muhammad SAW menggunakan pelbagai cara untuk menghentikan penyebaran Islam. Para pengikut Nabi Muhammad SAW, terutamanya yang berasal daripada golongan yang lemah dan budak, mengalami seksaan yang sangat kejam.

- A. **Bilal bin Rabah:** Seorang hamba yang memeluk Islam, diseksa dengan sangat kejam oleh tuannya, Umayyah bin Khalaf. Bilal ditindih dengan batu besar di tengah-tengah terik matahari dan dipaksa untuk meninggalkan agamanya. Tetapi dia tetap teguh pada keyakinannya, dengan hanya mengucapkan “Ahad, Ahad” iaitu Allah itu Satu.
- B. **Ammar bin Yasir dan Keluarganya:** Keluarga Yasir, termasuk Ammar dan ibu bapanya, Yasir dan Sumayyah, juga mengalami seksaan yang sangat berat. Sumayyah menjadi syahid pertama dalam Islam setelah dibunuh dengan kejam oleh Abu Jahal.
- C. **Keluarga Nabi dan Sahabat Terdekat:** Nabi Muhammad SAW sendiri dan keluarganya juga tidak terlepas daripada intimidasi. Kaum Quraisy melancarkan boikot sosial dan ekonomi terhadap Bani Hasyim, keluarga besar Nabi, dengan harapan memaksa mereka untuk menyerahkan Nabi Muhammad.
- D. **Pemboikotan:** Kaum Quraisy memboikot Bani Hasyim dan Bani Muthalib, mengasingkan mereka di lembah Abu Talib selama tiga tahun. Boikot ini menyebabkan penderitaan yang luar biasa, termasuk kekurangan makanan dan keperluan asas yang lain.
- E. **Hijrah ke Habsyah:** Akibat tekanan dan penyeksaan yang berterusan, Nabi Muhammad SAW mencadangkan beberapa pengikutnya untuk berhijrah ke Habsyah (Ethiopia), di mana mereka mendapatkan perlindungan daripada Raja Najasyi yang adil.

Penyiksaan dan Tekanan yang Dihadapi oleh Para Mukminin

Setelah Nabi Muhammad SAW mula berdakwah secara terang-terangan, orang-orang Mukmin yang baru memeluk Islam mula disakiti. Bahkan, Rasulullah SAW sendiri turut disakiti. Orang Musyrik berasa bimbang apabila Rasulullah memperbodohkan pemikiran mereka, membongkar kecacatan tuhan-tuhan mereka, dan mengemukakan agama baru yang mengajak kepada Tuhan yang Esa. Tuhan yang tidak dapat dilihat oleh mata dan pandangan, sedangkan Dia yang mengetahui hakikat pandangan mata. Dia juga Tuhan yang Maha Lemah Lembut lagi Maha Mengetahui apa yang telah dan akan berlaku.

Dalam tempoh ini, Rasulullah SAW bersama orang-orang Mukmin berhimpun secara sulit di rumah al-Arqam bin Abi al-Arqam. Al-Arqam bin Abi al-Arqam ketika itu telah memeluk Islam. Baginda membacakan ayat-ayat al-Quran yang diterimanya kepada mereka di samping mengajar mereka hukum-hakam dan syariat agama yang telah diturunkan ketika itu.

Dakwah Kaum Kerabat di Bukit Sofa

وَأَنْذِرْ عَشِيرَتَكَ الْأَقْرَبِينَ

Ertinya: "Dan berilah peringatan kepada kerabat-kerabatmu yang dekat."

(Surah asy-Syu'ara': ayat 214)

Langkah pertama yang diambil oleh Rasulullah SAW selepas turunnya ayat di atas ialah mengajak Bani Hasyim. Mereka memenuhi jemputan ini, termasuk beberapa orang daripada Bani al-Muththalib bin Abdi Manaf seramai 45 orang. Maka Baginda berdiri di Bukit Sofa, menyeru satu per satu keluarga Quraisy. Baginda mengajak mereka kepada Islam dan meninggalkan penyembahan berhala. Baginda memotivasi mereka kepada syurga dan memberi amaran tentang neraka. Ekoran dakwah itu, Abu Lahab menengking Baginda: "Celaka kamu, adakah untuk ini kamu mengumpulkan kami?"

Quraisy ingin bertindak ke atas Rasulullah SAW, namun bapa saudara Baginda, Abu Talib, melindunginya. Beliau enggan menyerahkan Baginda kepada mereka. Setelah Quraisy beredar, Abu Talib meminta Baginda untuk mengendurkan dakwahnya. Baginda menyangka bapa saudaranya tidak lagi mahu membantunya, maka Baginda mengucapkan kata-katanya yang masyhur: "Demi Allah, wahai bapa saudaraku! Kalau mereka meletakkan matahari di sebelah kananku dan bulan di sebelah kiriku supaya aku meninggalkan urusan ini, sekali-kali aku tidak akan meninggalkannya, sehinggalah Allah memenangkannya atau aku binasa kerananya."

Selepas peristiwa tersebut, orang Musyrik semakin hebat menyakiti Rasulullah SAW dan para sahabat. Sehingga ada yang mati disiksa dan ada yang buta. Apabila Quraisy melihat orang-orang Mukmin tetap teguh dengan akidah mereka (sekalipun disiksa dan disakiti), mereka membuat keputusan untuk berunding dengan Rasulullah SAW. Mereka menawarkan harta sebanyak mana yang Baginda mahu, atau melantik Baginda sebagai raja mereka. Namun, Baginda menolak semua tawaran itu.

Reaksi Kaum Quraisy

Apabila orang Quraisy mengetahui bahawa Muhammad SAW sama sekali tidak berhenti berdakwah, mereka kembali memerah fikiran. Atas sebab ini, mereka memilih beberapa cara untuk menghalang dakwah ini, yang boleh disimpulkan dalam perkara berikut:

1. Ejekan, Hinaan dan Mentertawakan

Perbuatan ini bertujuan untuk mengganggu orang Islam dan melemahkan semangat mereka. Oleh itu, mereka melemparkan pelbagai tuduhan lucu dan cemuhan sewenang-wenangnya terhadap Rasulullah SAW. Mereka memanggilnya gila. Firman Allah:

وَقَالُوا يَا أَيُّهَا الَّذِي نُزِّلَ عَلَيْهِ الذِّكْرُ إِنَّكَ لَمَجْنُونٌ

Ertinya: *"Mereka berkata, 'Wahai orang yang diturunkan al-Quran kepadanya. Sesungguhnya kamu benar-benar orang yang gila.'"*

(Surah al-Hijr: ayat 6)

Mereka juga menggelarnya sebagai ahli sihir dan pendusta.

وَعَجِبُوا أَنْ جَاءَهُمْ مُنْذِرٌ مِنْهُمْ وَقَالَ الْكَافِرُونَ هَذَا سِحْرٌ كَذَّابٌ

Ertinya: *"Dan mereka berasa hairan kerana datang kepada mereka seorang pemberi peringatan daripada kalangan mereka. Dan orang-orang kafir berkata, 'Ini Adalah seorang ahli sihir yang banyak berdusta.'"*

(Surah Saad: ayat 4)

2. Boikot Sosial dan Ekonomi

Orang Quraisy melancarkan boikot terhadap Bani Hasyim dan Bani Muthalib, boikot tersebut bertujuan untuk meletakkan tekanan terhadap Bani Hasyim supaya mereka tarik semula perlindungan mereka beri terhadap Nabi Muhammad SAW. Mereka tidak membeli atau menjual, berkahwin, atau bergaul dengan mereka. Boikot ini berlangsung selama beberapa tahun, menyebabkan penderitaan yang amat besar bagi umat Islam.

3. Ancaman dan Tekanan Psikologi

Orang Quraisy juga menggunakan ancaman dan tekanan psikologi untuk menghalang dakwah Islam. Mereka menawarkan harta dan kedudukan kepada Rasulullah SAW agar Baginda menghentikan dakwahnya, tetapi Baginda tetap teguh dengan pendiriannya.

4. Fitnah dan Pembohongan

Mereka menyebarkan fitnah dan pembohongan terhadap Rasulullah SAW untuk mengurangkan pengaruh Baginda dan menakutkan orang ramai supaya tidak mengikuti ajaran Islam seperti mengatakan al-Quran hanyalah kisah dongeng. Firman Allah:

وَقَالُوا أَسَاطِيرُ الْأَوَّلِينَ اكْتَتَبَهَا فَهِيَ تُمْلَى عَلَيْهِ بُكْرَةً وَأَصِيلًا

Ertinya: "Dan mereka berkata, 'Dongeng-dongengan orang dahulu, dia minta tuliskan lalu dibacakanlah dongeng itu kepadanya setiap pagi dan petang.'"

(Surah al-Furqan: ayat 5)

5. Seksaan Fizikal

Mereka juga menyiksa pengikut-pengikut Nabi SAW, secara fizikal terutama daripada golongan yang lemah dan hamba. Contohnya, Bilal bin Rabah disiksa dengan batu besar yang diletakkan di atas badannya, dan keluarga Yasir disiksa sehingga Sumayyah menjadi syahid pertama dalam Islam.

Rundingan dengan Abu Talib

Setelah mencuba segala cara, mereka tidak menemui jalan keluar selain pergi kepada bapa saudara Rasulullah SAW, Abu Talib. Mereka meminta agar Abu Talib menghentikan segala tindakan anak saudaranya. Untuk memperkuat permintaan mereka, mereka menggunakan alasan nenek moyang dan tradisi, dengan berkata, "Seruan untuk meninggalkan penyembahan nenek moyang kami dan pernyataan bahawa penyembahan ini tidak memberi manfaat dan tidak berdaya, adalah satu penghinaan dan penyesatan terhadap nenek moyang kami, yang telah lama berpegang kepada agama ini." Mereka merasakan bahawa ini adalah cara terbaik dan segera melaksanakannya.


Ibnu Ishaq menyebutkan bahawa beberapa pemimpin Quraisy pergi kepada Abu Talib dan berkata, "Wahai Abu Talib, sesungguhnya anak saudaramu telah menghina tuhan-tuhan kami, mencela agama kami, memperbodohkan harapan kami, dan menyesatkan nenek moyang kami. Kamu boleh menghalangnya daripada mengganggu kami, atau biarkan sahaja antara dia dan kami. Lagipun, kamu juga seperti kami. Marilah kita bersatu untuk menghalangnya agar kita dapat mencegahnya."

Dengan kata-kata yang lembut dan penolakan yang bijaksana, Abu Talib menolak permintaan mereka. Mereka pun pulang dengan tangan kosong, membolehkan Rasulullah SAW meneruskan dakwahnya, menyebarkan agama Allah dan menyeru manusia kepadanya.

Hijrah ke Habsyah Buat Kali Pertama


Pada suatu hari, musuh Allah, Abu Jahal menyiksa Sumayyah, ibu Ammar bin Yasir, suami, dan anak lelakinya. Abu Jahal menghampiri wanita malang itu dan menikam kemaluannya dengan lembing sehingga dia mati serta-merta. Abu Bakar RA merasa sangat kasihan. Kemudian, dia membebaskan sebahagian daripada mereka. Beberapa orang hamba ini ialah sahabat Bilal bin Rabah, Amir bin Fuhairah, Ummu Ubais, Zanirah, Nahdiah dan anak perempuannya, serta seorang hamba perempuan milik Bani Adiy yang disiksa oleh Umar (sebelum memeluk Islam). Menyaksikan semua penindasan ini, sementara Rasulullah SAW tidak berdaya untuk menghalangnya, beliau bersabda kepada para sahabatnya: "Bagaimana jika kamu keluar ke negeri Habsyah? Di sana ada seorang raja yang tidak menzalimi sesiapa yang tinggal di negerinya. Tinggallah di sana supaya Allah menjadikan bagi kamu jalan keluar dari kesusahan kamu ini."

Oleh itu, para sahabat berhijrah ke sana untuk buat kali pertama seramai 12 orang lelaki dan 4 wanita (beberapa sumber menyebut 12 lelaki, tetapi yang lebih umum diterima adalah 11 lelaki). Dengan penuh rahsia, mereka bergerak pada waktu malam ke pantai agar tidak dikesan oleh Quraisy. Selepas orang Quraisy menyedari pemergian orang Islam, mereka segera mengejar. Namun, umat Islam berjaya beredar dengan selamat dan mendapat layanan yang baik di Habasyah. Tiga bulan selepas bermulanya hijrah, umat Islam mengalami pelbagai perubahan yang berlaku di Mekah. Telah timbul di kalangan umat Islam keinginan yang kuat untuk menyebarkan dakwah di Mekah, di mana ketika itu Hamzah bin Abdul Muthalib (bapa saudara Rasulullah) dan Umar bin Khattab mengisytiharkan keislaman mereka. Pada masa itu, Hamzah adalah seorang pemuda Quraisy yang sangat dihormati, manakala Umar adalah seorang yang sangat tegas dan ditakuti. Oleh itu, apabila Hamzah dan Umar memeluk Islam, kaum Quraisy segera menyedari bahawa Rasulullah semakin mendapat sokongan dan perlindungan. Mereka mula secara beransur-ansur menghentikan beberapa keganasan yang pernah mereka lakukan sebelum ini. Umat Islam kini boleh solat terus di hadapan Kaabah.



Sudah tentu berita gembira ini sampai kepada mereka yang berada di luar negara dan mereka sangat gembira dengan perubahan di kampung halaman mereka. Oleh itu, tidak hairanlah kerinduan terhadap kampung halaman semakin terasa, jiwa mereka merindui tanah Mekah tempat sanak saudara mereka berkumpul. Maka mereka pun kembali ke Mekah dalam suasana dan keadaan yang baru dan dengan lebih berani. Mereka percaya bahawa Hamzah dan Umar akan membawa kemuliaan dan kekuatan kepada umat Islam. Jiwa mereka sangat tertarik untuk sentiasa berada di bawah naungan Kaabah.

Namun, kaum Quraisy cuba memberikan penentangan baru terhadap keislaman Hamzah dan Umar. Dari satu pihak mereka menggunakan taktik pengkhianatan terkini dan dari pihak lain mereka kembali menggunakan keganasan. Mereka menambah peluru untuk memerangi Nabi dan para sahabat. Peluru baharu yang dimaksudkan ialah pelaksanaan boikot ekonomi ke atas umat Islam, yang mengandungi perkara-perkara berikut:

- 
- a) Muhammad dan keluarga serta pengikutnya tidak dibenarkan berkahwin dengan orang Quraisy yang lain, sama ada lelaki atau perempuan.
 - b) Orang Quraisy tidak dibenarkan membeli atau menjual apa-apa barang dengan Muhammad, keluarga, dan pengikutnya.
 - c) Orang Quraisy tidak dibenarkan menjalin persahabatan atau pergaulan dengan Muhammad, keluarga, dan pengikutnya.
 - d) Orang Quraisy tidak dibenarkan mengasihi atau menjaga Muhammad, keluarga, dan pengikutnya.
 - e) Undang-undang yang ditetapkan ini, setelah ditulis dan digantung di Kaabah, telah ditetapkan sebagai undang-undang suci bagi kaum Quraisy terhadap Muhammad, keluarga, dan pengikutnya.
 - f) Undang-undang ini akan tetap berkuat kuasa selagi keluarga Bani Hasyim dan Bani Muthalib belum menyerahkan Muhammad kepada kaum Quraisy untuk dibunuh.

Apabila Muhammad diserahkan kepada mereka, undang-undang ini tidak lagi terpakai.

Peristiwa Hijrah Kali Kedua ke Habsyah

Dengan berlakunya undang-undang boikot, Rasulullah memerintahkan umat Islam untuk berhijrah ke negeri Habsyah untuk kali kedua. Terdapat 101 orang yang berhijrah, terdiri daripada 83 lelaki dan 18 wanita. Ketua kumpulan dan juga orang yang bertanggungjawab terhadap segala yang berkaitan dengan muhajirin ialah sahabat Ja'far bin Abi Talib.

Umat Islam mendapat perlindungan baik dengan Raja Najasyi. Apabila orang Quraisy mengetahui tentang hijrah ini, mereka menghantar Abdullah bin Abi Rabi'ah dan Amr bin 'Ash (sebelum mereka berdua memeluk Islam) kepada Raja Najasyi dengan membawa hadiah. Mereka berharap Raja Najasyi menolak kehadiran orang Islam dan mengembalikan mereka ke Mekah.

Mengetahui hal ini, orang-orang kafir Quraisy memerintahkan Abdullah bin Abi Rabi'ah dan Amr bin Al-As untuk mengejar mereka. Mereka berdua bertemu dengan Raja Najasyi dengan membawa banyak hadiah dan meminta Raja Najasyi agar sudi mengusir pendatang Islam tersebut. Permintaan delegasi Quraisy tidak segera dikabulkan oleh Raja Najasyi. Namun, Raja Najasyi ingin mendengar daripada orang Islam sendiri sebelum membuat keputusan.

Ja'far bin Abi Talib RA selaku jurubicara menjelaskan kepada Raja Najasyi tentang ajaran Islam dan keadaan yang menyebabkan mereka berhijrah. Ja'far bin Abi Talib RA pun membaca surah Maryam yang membuatkan Raja Najasyi menangis. Raja Najasyi menyatakan bahawa apa yang dibawa oleh Rasulullah SAW dan ajaran Nabi Isa adalah dari sumber yang sama. Raja Najasyi menolak permintaan Quraisy dan mengembalikan hadiah mereka.

Keesokan harinya, utusan Quraisy menghadap Raja Najasyi sekali lagi, menuduh orang Islam menghina Nabi Isa. Setelah ditanya, Ja'far menjelaskan bahawa pandangan Islam terhadap Nabi Isa adalah Pandangan kami mengenai Isa sesuai dengan yang diajarkan kepada kami oleh Nabi kami, iaitu Nabi Isa adalah hamba Allah, utusan Allah, ruh Allah dan kalimat-Nya yang diturunkan. Raja Najasyi memuji penjelasan Ja'far dan sekali lagi menolak permintaan Quraisy.

Penjelasan Ja'far bin Abi Talib berjaya mematahkan tipu daya utusan Quraisy tersebut. Raja Najasyi memerintahkan agar semua pemberian daripada Quraisy dikembalikan. Utusan Mekah pun meninggalkan negara Habsyah. Bagi kaum muhajirin, Raja Najasyi memberi izin untuk tinggal di negaranya dengan aman dan damai selama-lamanya.

SESI KEDUA

SELEPAS HIJRAH KE HABSYAH HINGGA HIJRAH KE MADINAH

1. HASIL PEMBELAJARAN:

- Mengenal pasti dan memahami peristiwa-peristiwa penting yang berlaku selepas Hijrah ke Habsyah sehingga Hijrah ke Madinah, serta impaknya terhadap perkembangan dakwah Islam.
- Menganalisis kepentingan peristiwa Isra' dan Mi'raj sebagai salah satu peristiwa penting dalam perjalanan spiritual Rasulullah SAW dan umat Islam.
- Memahami strategi dakwah Rasulullah SAW kepada kabilah-kabilah Arab dan bagaimana bai'ah dengan penduduk Yathrib (Madinah) menjadi asas kepada penubuhan negara Islam di Madinah.

2. ISI KANDUNGAN UTAMA:

- Pendahuluan
- Peristiwa Tahun Sedih
- Peristiwa Dakwah Nabi ke Taif
- Peristiwa Isra' dan Mikraj
- Dakwah kepada Kabilah-kabilah Arab
- Bai'ah Aqabah Pertama
- Bai'ah Aqabah Kedua
- Hijrah ke Madinah
- Penutup

Peristiwa Tahun Dukacita

Fasa ini lebih istimewa berbanding fasa-fasa yang lain ekoran berlaku beberapa peristiwa yang terkenal:

Abu Talib, bapa saudara Rasulullah s.a.w. telah meninggal dunia pada tahun ke-10 kerasulan. Abu Talib semasa hayatnya, kuat mempertahankan anak saudaranya, iaitu Rasulullah SAW Quraishy tidak berjaya menyakiti diri Nabi s.a.w. sepanjang hayat Abu Talib kerana mereka hormat dan gerun kepadanya. Apabila beliau meninggal dunia, Quraishy mula berani bertindak kasar terhadap Nabi SAW. Lantaran itu, kematian beliau menimbulkan rasa sugul yang mendalam kepada Nabi SAW. Nabi bersungguh-sungguh mendesak Abu Talib untuk mengucap kalimah syahadah ketika beliau terbaring nazak pada saat-saat akhir kematiannya. Namun Abu Talib enggan kerana bimbang beliau akan mendapat malu daripada kaumnya.

Kadang-kadang ada kaum kerabat pendakwah yang tidak bersama dengan dakwahnya tetapi bertindak melindunginya. Situasi ini memberi faedah kepada dakwah ketika ia masih lemah. Kerana dia akan bertindak menghalang golongan jahat membunuh atau menyakitinya. Oleh yang demikian, sentimen kabilah dan kekeluargaan kadang-kadang boleh digunakan oleh pendakwah untuk melindungi dakwahnya selama mana beliau tidak seiringan (turut serta) melakukan kemungkaran bersama kaumnya.

Khadijah RA juga meninggal dunia pada tahun yang sama. Sebelum itu, Khadijah berperanan meringankan kerunsingan dan kesedihan Rasul SAW lantaran permusuhan Quraishy yang dihadapi Baginda. Apabila beliau meninggal dunia, Baginda merasa terlalu dukacita. Tahun kematian bapa saudara Baginda, Abu Talib dan isterinya, Khadijah dinamakan sebagai "Tahun Dukacita".

Isteri solehah yang beriman dengan dakwah kebenaran akan mempermudah banyak kesulitan yang dialami oleh suami yang berdakwah. Ini akan berlaku jika si isteri turut serta berkongsi kerunsingan dan penderitaan suami. Dengan perkongsian tersebut, si isteri akan meringankan bebanan kerunsingan suami. Ia juga akan membangkitkan dalam diri suami rasa untuk meneruskan dakwah dan tetap teguh di atas jalannya. Oleh itu, si isteri dapat memberi kesan kepada kejayaan dan kemenangan dakwah. Sikap Khadijah RA terhadap Rasulullah SAW merupakan contoh paling baik yang boleh dilakukan oleh seorang isteri yang beriman dengan dakwah kebaikan. Dia berperanan besar terhadap kejayaan suaminya sebagai pendakwah. Begitu juga keteguhan dan istiqamah beliau dalam dakwah. Kehilangan isteri seperti ini merupakan kerugian besar semasa pertempuran pengislahan sedang berlaku sengit. Kerugian ini menyebabkan suami yang berdakwah tidak dapat mengawal perasaannya, bahkan merasa sugul dan putus asa.



Kesedihan kerana kehilangan seorang kerabat yang berperanan melindungi dakwah walaupun dia tidak beriman merupakan kesedihan yang terbit daripada keikhlasan berdakwah. Sementara kesedihan terhadap kehilangan seorang isteri yang beriman dan ikhlas terbit daripada rasa setia kepada isteri yang telah menjadi contoh dalam pengorbanan dan sokongan. Oleh kerana itu, ketika Abu Talib meninggal dunia, Rasul SAW bersabda:


"Semoga Allah merahmati dan mengampun kamu. Aku akan tetap memohon ampun untuk kamu sehinggalah Allah menegah aku."

Oleh yang demikian, orang Islam ketika itu telah mencontohi Rasul mereka. Mereka turut memohon ampun untuk keluarga mereka yang mati dalam keadaan musyrik. Seinggalah turun firman Allah SWT:

"Tidaklah dibenarkan bagi Nabi dan orang-orang yang beriman, meminta ampun bagi orang-orang musyrik, sekalipun orang itu kaum kerabat sendiri, sesudah nyata bagi mereka bahawa orang-orang musyrik itu adalah ahli neraka." (at-Taubah: 113)

Dengan turunnya ayat tersebut, Nabi s.a.w. tidak lagi memohon ampun untuk Abu Talib. Begitu juga orang Islam tidak lagi memohon ampun kepada keluarga musyrik yang mati. Oleh kerana sebab-sebab di atas, sepanjang hayat Rasul SAW, Baginda terus mengingatkan kelebihan Khadijah, memohon rahmat untuknya dan berbuat kebajikan kepada teman temannya. Sikap Rasulullah ini membuatkan Aishah RA merasa cemburu dengan Khadijah (padahal Khadijah telah meninggal dunia). Ini kerana Aishah sering mendengar pujian Nabi SAW kepada Khadijah. Al-Bukhari meriwayatkan daripada Aishah RA:

Aku tidak merasa cemburu kepada isteri-isteri Nabi SAW sebagaimana aku cemburu kepada Khadijah. Aku tidak melihat Khadijah, namun Nabi SAW sering menyebut-nyebutnya. Ada masanya Baginda menyembelih kambing, kemudian Baginda memotongnya lalu Baginda mengirimkan kepada teman-teman Khadijah. Ada masanya aku berkata kepada Baginda: "Seolah-olah tiada wanita di dunia ini melainkan Khadijah". Baginda bersabda: "Dia sekian-sekian... dia sekian-sekian... (menyebut jasa dan kebaikan Khadijah). Aku juga mendapat anak daripadanya (Khadijah)."



Peristiwa Dakwah Nabi ke Taif

Apabila tipu daya dan perbuatan menyakiti Rasul s.a.w. yang dilakukan oleh Quraisy semakin hebat, iaitu selepas kematian bapa saudara dan isteri Baginda, Baginda menuju ke Taif. Baginda ke sana dengan harapan akan mendapat sambutan yang baik dan sokongan kepada dakwahnya daripada kalangan Bani Thaqif. Namun mereka menolak dakwah Baginda secara kasar. Mereka menghasut kanak-kanak untuk menyakiti Baginda. Kanak-kanak tersebut telah melontar batu ke arah Baginda sehingga darah mengalir daripada kedua kaki Baginda yang suci, dan Zaid bin Harithah RA yang berusaha melindungi Rasulullah SAW dari lemparan batu ketika itu mengalami luka di kepala. Baginda telah berlindung di sebuah kebun. Baginda memanjatkan doa kepada Allah dengan penuh khusyuk:

"Ya Allah, aku mengadu kepada-Mu kelemahan kekuatanku, sedikitnya kemampuanku dan hinanya aku pada pandangan manusia. Wahai Tuhan Yang Maha Pengasih, Kamulah Tuhan golongan yang lemah dan Kamu juga Tuhanku. Kepada siapa Kamu serahkan aku? Kepada orang jauh yang memandangkku dengan wajah bengis atau kepada musuh yang menguasai urusanku? Sekiranya Kamu tidak murka kepadaku, aku tidak peduli (apa yang menimpa). Namun keselamatan daripada-Mu lebih melapangkan aku. Aku berlindung dengan cahaya wajah-Mu yang menyinari kegelapan serta memperelokkan urusan dunia dan akhirat. Aku berlindung daripada kemarahan-Mu atau kemurkaan-Mu terkena kepadaku. Kamu berhak untuk mencela aku sehingga Kamu redha. Tiada kuasa dan tiada kekuatan melainkan dengan-Mu."

Rasulullah SAW pulang dari Taif dalam keadaan dakwah-nya tidak mendapat sebarang sambutan daripada kaum Thaqif. Yang ada hanyalah keislaman Addas, hamba kepada Utbah dan Syaibah, anak-anak lelaki Rabi'ah. Mereka memerhati Rasulullah SAW kemudian memanggil seorang hamba Nasrani milik mereka bernama Addas dan memintanya menyerahkan setandan kurma kepada Rasulullah SAW semasa Baginda sedang berlindung di dalam kebun mereka. Mereka memerintah beliau berbuat demikian setelah melihat Rasulullah kepenatan dan layanan buruk Thaqif kepada Baginda.

Sambil menghulurkan kurma itu, Addas berkata, "Silakan makan." Rasulullah SAW pun mengulurkan tangannya ke arah kurma sambil mengucap, "Bismillah (dengan nama Allah)," lalu menyantap kurma tersebut.

Mendengar Rasulullah SAW mengucapkan basmalah, Addas terkejut. Dia berkata, "Demi Allah, kalimah itu tidak pernah diucapkan oleh penduduk negeri ini." Rasulullah SAW bersabda, "Dari manakah asalmu? Apakah agamamu?"

Addas menjawab, "Agamaku Nasrani, aku berasal dari Ninawa."

Rasulullah SAW bersabda lagi, "(Rupanya engkau) berasal dari negeri seorang lelaki soleh bernama Yunus bin Matta."

"Apakah yang tuan ketahui tentang Yunus bin Matta?" tanya Addas.

Rasulullah SAW menjawab, "Dia adalah saudaraku. Dia adalah seorang nabi, sebagaimana aku juga seorang nabi."

Mendengar ucapan Rasulullah SAW, tiba-tiba Addas menundukkan tubuhnya dan mencium kepala, kedua-dua tangan, dan kedua-dua kaki Rasulullah SAW.

Menurut Ibnu Ishaq, dari kebun milik Utbah bin Rabi'ah itulah, Rasulullah SAW meninggalkan Taif untuk kembali ke Mekah.

Pemergian Rasul SAW ke Taif setelah penduduk Makkah menolak dakwahnya merupakan bukti kepada tekad yang kental dalam jiwa Rasul untuk meneruskan dakwahnya. Ia juga merupakan bukti sikap tidak putus asa Nabi SAW terhadap penerimaan orang ramai kepada dakwah. Baginda mencari medan baru untuk dakwah setelah terdapat halangan-halangan yang menyekat dakwah di medan pertamanya (kota Makkah). Sementara hasutan Bani Thaqif kepada kanak-kanak dan daripada kaum mereka supaya menyakiti Rasul SAW, menjadi bukti bahawa kejahatan sama sahaja walau di mana ia berada. Kejahatan bergantung harap kepada golongan jahil untuk menyakiti para pendakwah. Peristiwa kaki Nabi SAW luka mengalirkan darah padahal Baginda adalah Nabi yang mulia, menjadi contoh penting kesakitan dan penindasan yang akan ditanggung oleh pendakwah di jalan Allah. Manakala doa abadi Nabi SAW semasa berada di kebun menjadi penegasan kepada kejujuran Rasul dalam dakwah dan keazamannya untuk terus melaksanakan tugas dakwah meskipun berhadapan dengan berbagai kesulitan. Perkara yang penting bagi Baginda hanyalah redha Allah SWT semata-mata. Baginda tidak menghiraukan redha para pembesar, pemimpin, orang awam dan kebanyakan.

أَنْ لَمْ يَكُنْ بِكَ غَضَبُ عَلِيٍّ فَالْأَبَالِي

"Sekiranya Kamu tidak murka kepadaku, aku tidak peduli (apa yang menimpa)."

Dalam doa Baginda terkandung cara-cara memperolehi bekalan kekuatan daripada Allah. Iaitu dengan cara kembali dan meminta pertolongan-Nya ketika kesengsaraan yang dipikul pendakwah semakin berat. Doa ini juga menunjukkan perkara yang paling ditakuti oleh pendakwah ialah kemurkaan dan kemarahan Allah ke atas beliau. Bukannya kemurkaan makhluk selain-Nya.

Peristiwa Israk dan Mikraj

Berlaku mukjizat Israk dan Mikraj. Terdapat perselisihan berkenaan tarikh peristiwa ini berlaku. Secara pasti ia berlaku sebelum hijrah pada tahun ke-10 kenabian atau selepasnya. Menurut kitab Ath-Thabaqat Al-Kubra karya Ibnu Sa'd, peristiwa Isra' dan Mikraj berlaku kira-kira 18 bulan sebelum Hijrah.

Pendapat sahih yang dipegang oleh jumhur ulama, Isra' dan Mi'raj berlaku pada suatu malam secara jaga melibatkan jasad dan roh Nabi SAW, Baginda diisra'kan daripada Masjidil Haram ke Masjidil Aqsa. Kemudian Baginda dimi'rajkan ke langit yang tinggi. Seterusnya pulang kembali kerumah Baginda di Makkah pada malam itu juga. Baginda memberitahu Quraisy tentang mukjizat itu. Mereka mempersenda dan memperlekehkan Baginda. Namun Abu Bakar dan mereka yang kuat imannya telah membenarkan Baginda.

Pada malam Isra' dan Mi'raj tersebut, sembahyang lima waktu difardhukan ke atas setiap orang Islam yang baligh dan berakal.

Isra' merupakan perjalanan yang dengannya Allah SWT memuliakan Rasulullah SAW dari Masjidil Haram di Mekah ke Masjidil Aqsa di Baitulmaqdis, Palestin. Manakala Mi'raj pula adalah perjalanan selepas Isra', menuju ke lapisan langit sehingga mencapai kawasan yang tidak dapat dijangkau oleh ilmu makhluk, sama ada dari kalangan malaikat, manusia, mahupun jin.

Perjalanan ini merupakan salah satu mukjizat terbesar yang menjadi bukti kemuliaan Allah SWT terhadap Rasulullah SAW.

Sebuah riwayat yang agak panjang telah dinukilkan oleh Imam Al-Bukhari dan Imam Muslim berkenaan dengan peristiwa Isra' dan Mi'raj ini. Dalam riwayat tersebut dinyatakan bahawa Rasulullah SAW menunggang Buraq, sejenis makhluk hidup yang saiz tubuhnya lebih besar daripada keldai tetapi lebih kecil berbanding kuda, dan tali kekang diletakkan di hujung wajahnya. Dalam riwayat itu juga dinyatakan bahawa apabila tiba di Masjidil Aqsa, Rasulullah SAW menunaikan solat dua rakaat. Ketika itu, datanglah Malaikat Jibril sambil membawa sebuah bekas berisi arak dan sebuah bekas lain berisi susu. Rasulullah SAW memilih bekas yang berisi susu. Jibril berkata, "Engkau telah memilih fitrah..."

Dalam riwayat itu juga dinyatakan bahawa Rasulullah SAW naik ke langit pertama, kedua, ketiga, dan seterusnya sehingga sampai di Sidratul Muntaha. Di sanalah baginda menerima wahyu daripada Allah SWT. Sejak itu, solat lima waktu mula diwajibkan bagi seluruh umat Islam. Pada mulanya, solat yang diwajibkan berjumlah 50 rakaat dalam sehari semalam."

Keesokan paginya, apabila Rasulullah SAW menceritakan peristiwa yang baginda alami pada malam tersebut kepada orang ramai, golongan musyrikin segera menyebarkan berita itu kepada rakan-rakan mereka sambil mengejek Nabi Muhammad SAW. Memandangkan Rasulullah SAW mengaku telah pergi ke Baitulmaqdis, beberapa orang musyrik mencabar baginda untuk menjelaskan segala yang ada di sana. Walhal, ketika melawat Baitulmaqdis pada malam Isra', tidak pernah terlintas di fikiran Rasulullah SAW untuk memperhatikan dengan teliti segala perincian bangunan Baitulmaqdis, apatah lagi untuk mengira jumlah tiangnya. Apabila menerima cabaran sedemikian, Allah SWT menampakkan Baitulmaqdis di hadapan Rasulullah SAW.

Baginda pun dapat menjelaskan segala hal tentang Baitulmaqdis dengan sangat terperinci, seperti yang diminta oleh orang-orang kafir.

Imam Al-Bukhari dan Imam Muslim meriwayatkan bahawa Rasulullah SAW bersabda, "Ketika orang-orang Quraisy menganggap aku berdusta, aku pun berdiri di Hijr, kemudian Allah menampakkan Baitulmaqdis kepadaku. Maka, aku pun menceritakan kepada mereka semua tanda-tanda bangunan tersebut sambil aku melihat bangunan itu."

The background of the page is a large, vertical image of a mosque interior. It shows a series of arches and a large dome, with people sitting on the floor in the distance. The lighting is warm and the architecture is detailed.

Sementara itu, Abu Bakar As-Siddiq RA telah didatangi beberapa orang musyrik untuk menyampaikan perkara yang baru diceritakan oleh Rasulullah SAW. Mereka berharap sahabat rapat Rasulullah SAW ini akan menganggapnya sebagai pembohongan besar. Mereka juga berharap beliau tidak akan mempercayai Rasulullah SAW lagi.

Namun, Abu Bakar RA malah berkata, "Jika memang benar baginda (Muhammad SAW) mengatakan seperti itu, aku percaya. Bahkan, jika baginda mengatakan sesuatu yang lebih jauh (lebih ajaib) daripada itu, aku pasti akan tetap mempercayainya."

Pada pagi hari selepas malam Isra' Mi'raj, Malaikat Jibril datang memberitahu Rasulullah SAW tentang tata cara solat beserta waktu pelaksanaannya. Sebelum syariat solat lima waktu ditetapkan, Rasulullah SAW biasa melaksanakan solat dua rakaat pada waktu pagi dan dua rakaat pada waktu petang, sebagaimana yang dilakukan oleh Nabi Ibrahim AS.

Mukjizat Isra' dan Mi'raj mempunyai banyak rahsia. Antaranya:

Pertama: Menghubungkan isu Masjidil Aqsa dan kawasan sekitarnya dengan isu Dunia Islam. Ini kerana Makkah selepas perutusan Rasul SAW telah menjadi pusat perhimpunan Dunia Islam dan kesatuan visinya. Peristiwa Isra' Mi'raj ini juga menunjukkan usaha mempertahankan Palestin sebenarnya mewakili usaha mempertahankan Islam itu sendiri. Setiap orang Islam di pelbagai ceruk bumi wajib melaksanakannya. Kecuaian mempertahankan dan membebaskan Palestin merupakan kecuaiian terhadap Islam. Ia merupakan jenayah yang akan dihukum oleh Allah kepada setiap orang yang beriman dengan Allah dan Rasul-Nya.

Kedua: Isra' Mi'raj menjadi simbol kepada ketinggian kedudukan orang Islam dan lambang kepada kewajipan mengangkat dirinya mengatasi hawa nafsu dan syahwat dunia. Dia juga wajib menjadi manusia yang tiada tolok bandingnya dikalangan seluruh manusia. Sama ada dari segi kedudukannya yang tinggi, visinya yang mulia dan sikapnya yang sentiasa berlegar dalam lingkungan nilai-nilai yang baik untuk selama-lamanya.

Ketiga: Isra' Mi'raj juga menunjukkan penerokaan angkasa dan keluar daripada tarikan graviti bumi boleh diusahakan. Dalam peristiwa Isra' dan Mi'raj, Rasul kita merupakan angkasawan pertama dalam sejarah dunia seluruhnya. Meneroka angkasa seterusnya pulang ke bumi dengan selamat adalah perkara yang boleh berlaku. Sekalipun ia berlaku kepada Rasulullah SAW secara mukjizat pada zaman Baginda, namun ia boleh terjadi kepada manusia biasa melalui ilmu dan idea.



Kefardhuan solat pada malam Isra' dan Mi'raj menunjukkan hikmah kenapa solat disyariatkan. Allah SWT seolah-olah berfirman kepada hamba-hamba-Nya yang beriman: Sekiranya Mi'raj Rasul kamu dengan jasad dan roh ke langit merupakan mukjizat, kamu pula diperuntukkan solat lima waktu setiap hari, sebagai mi'raj (anak tangga) untuk kamu naik menemui-Ku dengan roh dan hati kamu. Jadikan solat lima kali sehari sebagai peningkatan roh yang boleh mengangkat kamu daripada tenggelam dalam hawa dan syahwat kamu, serta memperlihatkan kamu kebesaran, kekuasaan dan keesaan Aku. Ini mendorong kamu untuk memimpin muka bumi ini, bukan dengan cara memperhamba, menguasai dan menakluki (orang lain). Bahkan melalui jalan kebaikan dan ketinggian, juga dengan cara kesucian dan peningkatan roh menerusi jalan solat.

Dakwah kepada Kabilah-kabilah Arab



Rasul SAW menemui kabilah-kabilah Arab yang datang semasa musim haji (sebagaimana kebiasaan Baginda setiap tahun). Baginda mengajak mereka kepada Islam dan menyeru mereka meninggalkan penyembahan berhala. Rasulullah SAW membacakan beberapa ayat Al-Quran kepada mereka, lalu mengajak mereka mentauhidkan Allah SWT, walaupun tiada seorang pun yang mengikutinya.

Dalam kitab Ath-Thabaqat, Ibnu Sa'd berkata, "Setiap musim haji, Rasulullah SAW bertemu dengan para jemaah di kediaman mereka, di Ukaz, Mijannah, dan Zul Majaz. Baginda meminta mereka memberi sokongan dan perlindungan agar dapat menyampaikan risalah dan ganjaran syurga bagi mereka yang bersedia menjawab seruannya. Namun malangnya, tiada seorang pun bersedia membantu Rasulullah SAW.


Ketika itu, Rasulullah SAW berseru, 'Wahai sekalian manusia, berimanlah dan katakanlah sesungguhnya tiada Tuhan selain Allah. Dengan kalimah ini, kamu semua akan beruntung, dapat menguasai bangsa Arab, serta menundukkan bangsa-bangsa selain Arab. Seandainya kamu semua beriman, kelak kamu akan menjadi raja-raja di dalam syurga.'

Mendengar sabda Rasulullah SAW tersebut, Abu Lahab terus mencelah, 'Janganlah kamu mematuhinya. Sesungguhnya dia seorang pendusta yang durjana.' Hasilnya, seruan Rasulullah SAW ditanggapi dengan buruk dan menyakitkan."

Ibnu Ishaq meriwayatkan dari Az-Zuhri bahawa dia berkata, "Suatu ketika Rasulullah SAW mendatangi Bani Amir bin Sa'sa'ah untuk menyeru mereka ke jalan Allah SWT. Setelah Rasulullah SAW memperkenalkan diri, tiba-tiba seseorang di antara mereka yang bernama Baiharah bin Firas berkata, "Demi Allah, jika aku mengikuti pemuda Quraisy ini, pastilah aku dapat menguasai bangsa Arab."

Lelaki itu kemudian berkata, "Bagaimana menurutmu, jika sekarang kami berbaiat kepadamu, lalu Allah memilihkan seorang pengganti bagimu. Adakah kami akan dapat memegang urusan (sebagai penggantinya) setelah engkau tiada?"

Rasulullah SAW menjawab, "Urusan ini aku serahkan kepada Allah SWT. Dan Dia yang akan meletakkan (amanah kepemimpinan) kepada sesiapa yang Dia kehendaki."

The background of the page is a large, faded image of a mosque interior, showing a large dome and arched windows. In the top left corner, there is a smaller, circular inset image showing a group of people sitting on the floor of a mosque, possibly during a prayer or gathering.

Lelaki itu berkata kepada Rasulullah SAW, "Adakah kami akan menyerahkan pengorbanan kepada yang selain engkau, kerana jika Allah menjadikan pengganti untukmu ternyata urusan (kepemimpinan) akan diserahkan kepada mereka yang selain kami? (Jika begitu) maka kami tidak memerlukan urusan yang kau sampaikan itu."

Pada tahun kesebelas kenabian, Rasulullah SAW memperkenalkan diri kepada suku-suku Arab di luar Mekah, seperti yang biasa baginda lakukan setiap musim haji. Ketika berada di Aqabah, sebuah tempat melontar jamrah yang terletak antara Mina dan Mekah, Rasulullah SAW bertemu dengan sekumpulan orang dari suku Khazraj. Bilangan mereka ketika itu ialah tujuh orang. Rasulullah SAW bertanya kepada mereka, "Siapakah kamu sekalian?" "Kami dari suku Khazraj," jawab mereka.

Rasulullah SAW bertanya lagi, "Adakah kamu termasuk yang tinggal berdekatan dengan orang Yahudi?" "Ya," jawab mereka.

Rasulullah SAW bertanya lagi, "Sudikah kamu duduk bersama kami di sini sebentar? Aku ingin menyampaikan sesuatu." "Sudah tentu," jawab mereka.

Setelah semua duduk, Rasulullah SAW menyeru mereka ke jalan Allah SWT, memperkenalkan mereka kepada Islam, dan membacakan di hadapan mereka beberapa ayat Al-Quran. Rupanya, salah satu sebab yang melapangkan hati mereka untuk menerima Islam adalah kebiasaan orang-orang Yahudi yang tinggal bersama mereka. Yang mereka tahu, bangsa Yahudi adalah ahli kitab dan memiliki banyak pengetahuan. Uniknyanya, setiap kali berlaku perselisihan antara mereka dengan orang-orang Yahudi, mereka selalu berkata, "Seorang nabi akan segera diutus dan kini masanya telah tiba. Kami pasti akan mengikutinya dan kami akan mengalahkan kamu seperti dahulu bangsa 'Ad dan Iram dibinasakan."

Ketika Rasulullah SAW mengajak mereka untuk memeluk Islam, orang-orang Khazraj itu saling berpandangan seraya berkata, "Demi Allah, kamu pasti tahu bahawa dialah nabi yang dijanjikan kepada kamu oleh orang-orang Yahudi. Maka, jangan sampai mereka mendahului kamu untuk mengikutinya." Orang-orang Khazraj itu pun menyambut seruan Rasulullah SAW untuk memeluk Islam. Mereka berkata, "Sesungguhnya kami telah meninggalkan kaum kami ketika mereka sedang berselisih. Semoga denganmu Allah berkenan mempersatukan mereka semua. Kini kami akan menemui dan menyeru mereka kepada perkara (agama) yang kau sampaikan ini. Kami akan menunjukkan kepada mereka bahawa kami telah menerima agama ini. Jika benar Allah SWT berkenan menyatukan mereka, maka tiada seorang pun yang lebih mulia daripadamu."

Setelah berjanji akan kembali menemui Rasulullah SAW pada tahun berikutnya, mereka beranjak pergi meninggalkan tempat itu.

Proses memperkenalkan diri yang dilakukan oleh Rasulullah kepada kabilah-kabilah pada musim haji menjadi bukti bahawa seseorang pendakwah tidak sepatutnya membataskan dakwah mengajak manusia kepada kebaikan dalam lingkungan majlis dan persekitaran dirinya sahaja. Bahkan dia mestilah pergi ke setiap tempat manusia berhimpun atau lokasi yang berkemungkinan mereka berhimpun. Dia juga tidak sepatutnya berputus asa dengan penolakan mereka daripada semasa ke semasa. Kadang-kadang Allah SWT menyediakan untuk beliau, penyokong-penyokong yang beriman dengan dakwahnya yang baik, padahal dia tidak pernah terfikir dan menjangkakannya. Kadang-kadang kelompok kecil yang mendapat hidayah hasil usaha beliau dalam beberapa sempena akan memainkan peranan besar terhadap penyebaran dakwah. Kelompok kecil itu juga berperanan dalam merealisasikan kemenangan akhir dakwah terhadap kejahatan.

Bai'ah Aqabah Pertama

Pada tahun yang sama (tahun kesebelas kenabian), Islam telah tersebar di seluruh Kota Madinah yang pada ketika itu masih dikenali sebagai Yathrib.

Tahun berikutnya, 12 orang lelaki dari penduduk Madinah, yang kemudian dikenali sebagai kaum Ansar, berangkat untuk menemui Rasulullah SAW di Aqabah. Pertemuan ini kemudiannya dikenali sebagai Bai'ah Aqabah Pertama. Dalam pertemuan itu, mereka membai'ah Muhammad SAW, seperti "bai'ah kaum wanita" (maksudnya ialah bai'ah yang kandungan utamanya serupa dengan bai'ah kaum wanita, iaitu mereka tidak berbai'ah atas perang atau jihad. Bai'ah kaum wanita ini akhirnya benar-benar berlaku di Bukit Safa selepas mereka melakukan "Bai'ah lelaki"). Antara mereka ialah As'ad bin Zararah, Rafi' bin Malik, Ubadah bin Samit, dan Abu Al-Haitham bin At-Taihan.

Apabila mereka semua hendak beranjak pergi meninggalkan Rasulullah SAW, baginda memerintahkan Mus'ab bin Umair RA untuk pergi bersama mereka. Selain itu, Rasulullah SAW mengarahkan sahabat tersebut untuk membacakan Al-Quran, mengajarkan Islam dan pengetahuan agama kepada mereka. Oleh itu, Mus'ab kemudiannya digelar Muqri' Al-Madinah.

Bai'ah Aqabah Kedua

Selepas setahun berdakwah, Mus'ab bin Umair RA kembali ke Mekah pada musim haji tahun berikutnya. Kali ini beliau berangkat bersama rombongan besar yang terdiri daripada kaum Muslimin Madinah. Mereka bertolak ke Mekah, bercampur dengan para jemaah haji daripada kalangan musyrik.



Muhammad bin Ishaq meriwayatkan daripada Ka'ab bin Malik, "Kami melakukan bai'ah Aqabah di hadapan Rasulullah SAW pada pertengahan hari-hari tasyrik. Apabila kami selesai melaksanakan ibadah haji, iaitu pada malam di mana kami mengangkat janji di hadapan Rasulullah SAW, kami pun tidur pada malam itu bersama kaum kami dalam kafilah kami.

Tiga hari kemudian, kami keluar dari rombongan untuk bertemu Rasulullah SAW secara sembunyi-sembunyi. Akhirnya, kami tiba di sebuah Syi'b di kawasan Aqabah. Ketika itu, kami berjumlah 73 orang lelaki dan dua orang perempuan, iaitu Nasibah binti Ka'ab dan Asma binti Amr bin Adi. Kami berkumpul di Syi'b itu untuk menunggu kedatangan Rasulullah SAW bersama bapa saudaranya, Abbas bin Abdul Mutilib RA.

Kami berkata, "Ambillah daripada kami untuk Tuhanmu apa pun yang engkau suka!"

Rasulullah SAW lalu menyampaikan beberapa kalimat, membacakan Al-Quran, dan menyampaikan seruan kepada Islam. Selepas itu, Abbas bin Ubadah bin Naflah berkata, "Demi Allah yang telah mengutusmu dengan kebenaran, jika engkau mahu, esok kami sedia meluruskan keluarga kami meskipun harus dengan pedang."

Rasulullah SAW bersabda, "Kita tidak diperintahkan berbuat seperti itu. Sekarang kembalilah ke kafilah kamu."

Kami pun kembali ke tempat penginapan, kemudian tidur sehingga pagi. Pagi keesokan harinya, sekumpulan orang Quraisy tiba-tiba datang seraya berseru, "Wahai orang-orang Khazraj, kami mendengar kamu datang untuk membawa pergi sahabat kami (Muhammad SAW). Bahkan, kamu telah berbai'ah kepadanya untuk memerangi kami. Padahal, demi Allah, tidak ada satu pun perkampungan di Arab ini yang lebih kami benci untuk menyebabkan perang dengan penduduknya, selain kamu."

Selepas itu, muncullah beberapa orang musyrik dari rombongan kami. Mereka bersumpah dengan nama Allah, lalu berseru, "Kami tidak pernah melakukan semua itu, dan kami pun tidak tahu-menahu tentang urusan itu." (Sesungguhnya orang-orang musyrik itu telah berkata jujur kerana mereka memang tidak mengetahui apa yang kami lakukan). Kami pun saling berpandangan.

Setelah para jemaah haji melakukan nafar di Mina, orang-orang Quraisy terus mencari berita tentang bai'ah itu. Akhirnya, mereka pun mengetahui bahawa bai'ah itu memang benar-benar telah berlaku. Mereka lalu mengejar kami dan berjaya bertemu dengan Sa'ad bin Ubadah di sebuah tempat bernama Adzakhir,". Orang-orang Quraisy menangkap Mundzir, tetapi kemudian berjaya melarikan diri, manakala Sa'ad tidak seberuntung rakannya. Orang-orang Quraisy mengikat tangan Sa'ad ke lehernya dengan menggunakan tali kekang tunggangannya, lalu mengheret beliau ke Mekah. Mereka memukul Sa'ad dan menarik-narik rambutnya yang panjang.

Sa'ad berkata, "Demi Allah, mereka menarik-narik tubuhku. Seseorang di antara mereka mendekatiku dan berkata, "Celakalah engkau! Adakah engkau memiliki pelindung dari kalangan Quraisy? Atau adakah perjanjian antara engkau dengan mereka?"

Aku menjawab, "Tentu, demi Allah aku berada di bawah perlindungan Jabir bin Mut'im dan Harith bin Umayyah. Akulah yang menjadi pelindung mereka, manakala ada seseorang yang ingin menzalimi mereka di negeriku."

Orang itu berkata lagi, "Celakalah engkau! Sekarang panggillah mereka berdua."

Aku pun memenuhi permintaan orang itu. Tidak lama kemudian, datanglah Mut'im bin Adi dan Harith bin Umayyah. Merekalah yang membebaskan aku dari tangan mereka."

Ibnu Hisyam berkata, "Bai'ah Perang (Baiah Aqabah kedua) yang dilakukan setelah Allah SWT mengizinkan Rasulullah SAW berperang, memiliki beberapa ketentuan yang tidak terdapat dalam Bai'ah Aqabah pertama. Baiah yang pertama dilakukan dalam bentuk Bai'ah Perempuan. Dan itu dilakukan sebelum Allah SWT mengizinkan Rasulullah SAW berperang. Ketika Allah mengizinkan baginda berperang, Rasulullah SAW pun mengambil bai'ah dari mereka pada Bai'ah Aqabah kedua. Dan Allah menjadikan syurga sebagai balasan bagi mereka yang memenuhi bai'ah itu."

Ubadah bin Samit berkata, "Kami membai'ah Rasulullah SAW dengan Baiah Perang, iaitu untuk taat sepenuhnya, baik dalam keadaan susah mahupun senang, juga dalam keadaan genting mahupun tenang; tidak akan menentang perintah dari yang berhak mengeluarkan perintah; dan akan selalu berkata benar di mana pun berada..."

Mereka berbaiah untuk menolong dan menyokong Baginda, mempertahankan Baginda sebagaimana mereka mempertahankan wanita dan anak-anak mereka sendiri. Mereka pulang ke Madinah setelah Baginda memilih 12 orang ketua dalam kalangan mereka sebagai wakil kepada kaum mereka.

Keimanan tujuh orang pertama Ansar yang bertemu dengan Rasulullah SAW untuk kali pertama, telah menyebabkan kemasukan Islam ke Madinah. perkara itu memberi kesan kepada penyebaran Islam dan penguasaannya di sana. Ia membuka jalan kepada orang-orang mukmin yang tertindas di Makkah untuk menjadikan Madinah sebagai destinasi hijrah dan pusat mereka berhimpun. Rasulullah pula memperolehi tempat yang aman untuk membangunkan negara dan menyebarkan dakwah. Dari negara itu, para sahabat Baginda melancarkan penentangan kepada syirik dan orang musyrik. Mereka melancarkan perang dan pertempuran yang berakhir dengan kemenangan berkekalan di pihak iman dan kekalahan abadi di pihak syirik. Semoga Allah meredhai kaum Ansor, yang terdiri daripada Aus dan Khazraj. Mereka mempunyai jasa yang tidak putus-putus kepada Islam, orang Islam dan seluruh alam. Semoga Allah juga meredhai saudara mereka, kaum muhajirin yang terlebih dahulu beriman sebelum mereka, serta yang telah berkorban di jalan Allah dengan segala yang berharga, baik harta mahupun kampung halaman. Semoga Allah turut memasukkan kita bersama mereka semua ke dalam syurga Ridhwan.

Hijrah ke Madinah

Quraisy mendapat tahu tentang keislaman sekumpulan penduduk Yathrib. Lantaran itu, mereka meningkatkan penyeksaan kepada orang-orang mukmin di Makkah. Lalu Nabi SAW. mengarahkan orang-orang mukmin berhijrah ke Madinah. Mereka berhijrah secara sembunyi kecuali Umar Ra. Beliau telah memberitahu orang musyrik Quraisy tentang penghijrahannya seraya berkata: "Sesiapa yang mahu ibu kehilangan anaknya, esok tunggu aku di tengah wadi ini." Namun tiada seorang pun berani keluar menyahut cabarannya.

Apabila Quraisy merasa yakin bahawa orang Islam telah memperolehi kekuatan dan perlindungan di Madinah, mereka mengadakan satu persidangan di Dar an-Nadwah. Mereka bersidang untuk memikirkan langkah menghapuskan Rasul SAW sendiri. Mereka memutuskan untuk memilih seorang pemuda yang gagah daripada setiap kabilah. Kemudian kesemua pemuda tersebut membunuh Baginda serentak. Justeru itu, tuntutan darah Baginda akan teragih kepada setiap kabilah menyebabkan Bani Manaf (keluarga Rasulullah) tidak upaya memerangi mereka semua dan terpaksa menerima bayarun diat sahaja. Setelah itu pemuda-pemuda yang diwakilkan untuk membunuh Rasul SAW berhimpun di muka pintu

rumah Baginda pada malam Hijrah. Mereka menunggu Baginda keluar untuk membunuhnya.

Pada malam tersebut Rasulullah SAW tidak tidur di tempat tidurnya. Baginda telah meminta Ali RA untuk tidur di tempatnya itu. Baginda juga memerintahkan beliau agar memulangkan barang-barang amanah yang disimpan oleh orang kafir Quraisy kepada Baginda pada keesokan harinya kepada pemiliknya. Rasul SAW telah meninggalkan rumahnya tanpa disedari oleh pemuda-pemuda yang diwakilkan untuk membunuhnya. Baginda pergi ke rumah Abu Bakar Ra. Sebelum itu, Abu Bakar RA telah menyiapkan dua kenderaan untuknya dan Rasul SAW Mereka berdua memutuskan untuk keluar dari Makkah. Abu Bakar mengupah Abdullah bin Uraiqit ad-Daili, seorang musyrik untuk menjadi penunjuk jalan ke Madinah. Dengan syarat dia mengelakkan jalan yang biasa diketahui dan menggunakan jalan lain yang tidak diketahui oleh kafir Quraisy.

Rasulullah SAW dan sahabat Baginda, Abu Bakar RA keluar berhijrah pada hari Khamis, 1 Rabiul Awal, tahun ke-53 kelahiran Baginda SAW Hanya Ali RA dan keluarga Abu Bakar RA yang mengetahui tentang hijrah Baginda tersebut. Anak-anak perempuan Abu Bakar Ra, Aishah dan Asma' berperanan menyediakan bekalan untuk mereka berdua. Asma' telah memotong sebahagian daripada tali ikat pinggangnya, lalu mengikat mulut karung makanan tersebut. Daripada peristiwa itu, dia digelar: "Zat an-Nitoqain" (Perempuan yang mempunyai dua tali ikat pinggang). Dengan bantuan Abdullah bin Uraiqit, Rasulullah SAW dan Abu Bakar menghala ke Yaman sehingga sampai ke Gua Thur. Mereka bersembunyi di dalamnya selama tiga malam. Turut bermalam bersama mereka, Abdullah bin Abu Bakar yang masih remaja. Beliau seorang pemuda yang berpengetahuan, mahir, peka dan cepat memahami. Beliau akan keluar meninggalkan mereka pada waktu sahur lalu berpagi-pagian bersama Quraisy Makkah seolah-olah beliau tidur di Makkah. Apa-apa rancangan jahat terhadap Rasulullah dan Abu Bakar yang beliau dengar daripada Quraisy, akan diingat sehinggalah beliau menyampaikannya kepada mereka berdua pada waktu petangnya.

Kiamat seolah-olah berlaku kepada Quraisy setelah Rasulullah SAW terlepas daripada usaha membunuhnya. Mereka keluar mengejar Baginda mengikut jalan Makkah yang biasa tetapi gagal menemui Baginda. Mereka menghala menuju jalan ke Yaman sehingga sampai di muka Gua Thur. Sebahagian daripada mereka berkata: "Boleh jadi Muhammad dan temannya ada di dalam gua ini." Namun sebahagian yang lain menjawab:


"Kamu tidak nampakkah apa yang ada di muka gua ini. Bagaimana labah-labah menganyam sarangnya dan burung-burung bersarang di sini? Ini menunjukkan tiada seorangpun yang memasuki gua ini sejak sekian lama." Abu Bakar RA melihat kaki-kaki mereka ketika mereka sedang berdiri di muka gua itu. Beliau menggeletar bimbangankan nyawa Rasul s.a.w., seraya berkata: "Demi Allah! Wahai Rasulullah, kalau salah seorang daripada mereka melihat ke tempat letak kakinya, nescaya dia akan melihat kita." Rasul s.a.w. mententeramkannya dengan bersabda:

"Wahai Abu Bakar, kamu sangka kita berdua, sedangkan Allah adalah yang ketiga"

Quraisy mengutuskan utusan menemui kabilah-kabilah dengan membawa tawaran sejumlah besar harta yang cukup menggoda sesiapa yang tamak. Tawaran ini ditujukan kepada sesiapa yang menemui Rasul s.a.w. dan teman Baginda, membunuhnya, atau menawannya. Oleh itu, Suraqah bin Ja'syam menyahut tawaran itu. Dia bertekad dalam dirinya untuk mencari Rasulullah s.a.w. dan Abu Bakar demi membolot sendiri hadiah tersebut.

Setelah usaha memburu dan mencari Rasulullah s.a.w. dan temannya, Abu Bakar terhenti, mereka berdua keluar daripada gua tersebut bersama-sama penunjuk jalan mereka. Mereka melalui jalan pantai (pantai Laut Merah) merentasi jarak yang jauh. Namun Suraqah telah berjaya menjejaki mereka. Apabila Suraqah mendekati mereka berdua, kaki-kaki kudanya terbenam ke dalam pasir dan tidak berupaya untuk berjalan. Dia mencuba sebanyak tiga kali supaya kudanya menuju ke arah Rasul s.a.w., namun kudanya tetap enggan. Pada ketika itu, dia yakin bahawa di hadapannya ialah seorang Rasul yang mulia. Lantas dia meminta supaya Rasul s.a.w. berjanji memberikannya sesuatu, jika dia menolong Baginda. Baginda menjanjikan untuknya dua gelang tangan yang dipakai oleh Kisra. Suraqah kemudiannya pulang ke Makkah dan berlakon seolah-olah dia tidak menemui sesiapa.

Rasul SAW dan teman Baginda (Abu Bakar) telah sampai ke Madinah pada 12 Rabiul Awal. Baginda sampai ke sana setelah para sahabat lama menanti. Mereka keluar setiap pagi ke pinggir Madinah dan hanya pulang setelah matahari memancar terik pada waktu tengah hari. Apabila mereka melihat Baginda, mereka merasa amat gembira. Kanak-kanak mula mendendangkan nasyid diiringi dengan gendang-gendang:



Bulan purnama telah terbit kepada kami,
dari jalan-jalan bukit ul-Wada.

Wajib ke atas kami untuk bersyukur,
terhadap seruan penyeru kepada Allah.

Wahai utusan yang diutuskan kepada kami,
Kami datang bersama perkara yang dipatuhi.

Dalam perjalanan Baginda s.a.w. ke Madinah, Baginda singgah di Quba, sebuah kampung di selatan Madinah. Kira-kira dua batu dari Madinah. Baginda telah mengasaskan masjid pertama yang dibina dalam Islam dan tinggal di sana selama empat hari. Kemudian Baginda bertolak ke Madinah pada pagi Jumaat. Ketika Baginda di perkampungan Bani Salim bin 'Auf, waktu solat Jumaat telah masuk. Lalu Baginda membina sebuah masjid di situ dan menunaikan solat Jumaat pertama dalam Islam. Baginda SAW menyampaikan khutbah pertama dalam Islam. Seterusnya Baginda menyambung perjalanan menuju ke Madinah. Apabila sampai di sana, tindakan pertama yang dilakukan ialah memilih tempat unta Baginda berhenti duduk, untuk dijadikan sebagai masjid. Tempat tersebut adalah milik dua orang kanak-kanak Ansor yang yatim. Baginda tawar menawar harga tanah tersebut dengan mereka berdua. Kedua-dua kanak-kanak itu berkata: "Kami berikannya kepada kamu, wahai Rasulullah." Namun Baginda berkeras untuk membelinya dengan harga 10 dinar emas yang dibayar menggunakan harta Abu Bakar. Kemudian Baginda melakukan kempen agar orang Islam turut serta membina masjid. Mereka segera melakukannya. Rasul s.a.w. turut terlibat bersama mereka memindahkan batu bata, sehinggalah sempurna pembinaan masjid tersebut. Dinding masjid itu dibina daripada batu bata dan bumbungnya daripada pelepah-pelepah kurma yang diletakkan pada batang-batang kurma.

Kemudian Baginda s.a.w. mempersaudarakan di antara Muhajirin dan Ansor. Baginda menjadikan untuk setiap Ansor seorang saudara daripada Muhajirin. Ada seorang Ansor telah membawa saudara Muhajirinnya ke rumahnya. Beliau menawarkan kepada saudara Muhajirinnya untuk membahagi sama rata semua barang yang terdapat di dalam rumahnya.

Kemudian Rasulullah s.a.w. menulis satu piagam bertulis antara Muhajirin dan Ansor. Di dalamnya Baginda berjanji untuk berbaik-baik dengan Yahudi di samping mengakui hak mereka dalam agama dan harta. Ibnu Hisyam telah menyatakan piagam tersebut dengan panjang lebar dalam kitab sirahnya. Ia mengandungi prinsip-prinsip yang menjadi dasar asas kepada negara Islam yang pertama. Di dalamnya dinyatakan prinsip kemanusiaan, keadilan sosial, toleransi agama dan kerjasama demi kemaslahatan masyarakat yang patut dirujuk, difahami dan dihafal oleh setiap pelajar.



Beberapa prinsip am yang terkandung dalam piagam bersejarah yang abadi ini:

- i. Kesatuan umat Islam tanpa sebarang diskriminasi antara mereka.
- ii. Persamaan warga-warga umat Islam dari segi hak dan kemuliaan. Umat Islam perlu saling bahu membahu kecuali dalam kezaliman, dosa dan permusuhan.
- iii. Penyertaan umat dalam menentukan bentuk hubungan dengan musuh-musuh.
- iv. Seluruh orang Islam perlu mempunyai satu pendirian terhadap musuh mereka.
- v. Penubuhan masyarakat di atas sistem yang terbaik dan teguh.
- vi. Membanteras pemberontak negara dan pengganggu gugat sistem awam di samping kewajipan agar tidak membantu mereka.
- vii. Hak perlindungan kepada sesiapa yang ingin hidup bersama orang Islam apabila dia menjalin hubungan baik, bekerjasama, tidak menzalimi dan mencero bohi hak orang Islam.
- viii. Bukan Islam mempunyai hak dalam agama dan harta mereka. Mereka tidak dipaksa memeluk agama Islam dan harta mereka tidak boleh dirampas.
- ix. Bukan Islam mestilah memberi sumbangan kepada pembiayaan negara sebagaimana orang Islam memberi sumbangan.
- x. Bukan Islam mestilah bekerjasama dengan orang Islam untuk menghalang bahaya yang menggugat entiti negara melalui penentangan terhadap setiap pencerobohan.
- xi. Bukan Islam juga mestilah turut serta menanggung kos peperangan selagi mana negara berada dalam keadaan perang.
- xii. Negara mestilah membantu bukan Islam yang dizalimi sebagaimana ia menolong setiap orang Islam yang dicerobohi.
- xiii. Orang Islam dan bukan Islam tidak boleh sama sekali melindungi musuh-musuh negara dan konco-konco mereka.
- xiv. Sekiranya kemaslahatan umat terletak pada perdamaian, semua warga wajib menerima perdamaian, sama ada orang Islam mahupun bukan Islam.
- xv. Seseorang tidak dihukum dengan sebab dosa atau kesalahan orang lain. Seorang penjenayah sebenarnya melakukan jenayah terhadap diri dan keluarganya sendiri.
- xvi. Kebebasan bergerak dalam negara dan kebebasan untuk keluar negara adalah terpelihara di bawah perlindungan negara.
- xvii. Tiada perlindungan kepada orang yang berdosa dan orang yang zalim.
- xviii. Masyarakat ditegakkan di atas dasar kerjasama dalam kebajikan dan taqwa, bukan dalam dosa dan permusuhan.
- xix. Prinsip-prinsip di atas dipelihara oleh dua kekuatan:
 - Kekuatan maknawi (spiritual) iaitu: Keimanan rakyat kepada Allah, merasakan muraqabah-Nya (pemerhatian Allah) terhadap mereka dan penjagaan-Nya kepada sesiapa yang berbuat baik dan setia.
 - Kekuatan maddiyyah (material) iaitu: Kepimpinan negara yang diwakili oleh Nabi Muhammad SAW.

SESI KETIGA

PEPERANGAN AWAL DAN ASAS-ASAS PENGUKUHAN NEGARA ISLAM

1. HASIL PEMBELAJARAN:

- Memahami peperangan-peperangan utama yang dilalui oleh Rasulullah SAW.
- Mengenal pasti strategi-strategi peperangan dan impaknya terhadap perkembangan Islam.
- Menganalisis impak peperangan awal ini terhadap perkembangan dan pengukuhan negara Islam, termasuk bagaimana kemenangan dan kekalahan mempengaruhi moral dan penyebaran Islam.
- Peserta akan dapat mengenal pasti pengajaran dan nilai-nilai yang boleh diambil daripada peperangan ini, seperti pentingnya ketaatan, kesabaran, dan persiapan yang rapi dalam menghadapi cabaran.

2. ISI KANDUNGAN UTAMA:

- Pendahuluan
- Perang Badar
- Perang Uhud
- Ghazwah Bani Nadhir
- Ghazwah al-Ahzab
- Ghazwah Bani Quraizah
- Penutup


PERANG BADAR



Perang Badar berlaku pada 17 Ramadhan tahun ke-2 hijrah. Ia bermula apabila Nabi SAW mengajak para sahabat Baginda untuk menyekat kafilah dagang Quraisy yang pulang dari Syam ke Makkah. Misi asal sekatan tersebut bukannya untuk tujuan peperangan. Walau bagaimanapun, kafilah yang diketuai oleh Abu Sufyan telah terselamat daripada sekatan orang Islam. Namun, sebelum itu, Abu Sufyan telah mengutuskan utusan kepada Quraisy untuk keluar melindungi kafilahnya. Rentetan daripada permintaan tersebut, Quraisy keluar dengan kira-kira 1000 orang tentera, termasuk 600 orang tentera berbaju perisai, 100 ekor kuda yang dipakaikan baju perisai, serta 700 ekor unta. Mereka juga membawa penyanyi-penyanyi perempuan yang memukul gendang dan menyanyi untuk mengutuk orang Islam.

Bilangan orang Islam pula seramai 313 atau 314 orang, kebanyakan mereka daripada golongan Ansar. Mereka membawa 70 ekor unta dan dua atau tiga ekor kuda sahaja. Mereka bergilir-gilir dalam kumpulan kecil menaiki unta tersebut dari satu masa ke satu masa. Sebelum Nabi SAW memasuki pertempuran, Baginda ingin mendapatkan pandangan para sahabatnya, khususnya kaum Ansar. Baginda ingin mengetahui pendapat mereka mengenai penglibatan dalam peperangan ini. Kaum Muhajirin telah mencadangkan kepada Baginda untuk terlibat dalam peperangan itu dan mereka telah berucap dengan baik. Kemudian Ansar menyedari Baginda mahukan pandangan mereka. Lantaran itu, Saad bin Muaz, ketua Ansar, berkata kepada Baginda:

"Wahai Rasulullah, kami telah beriman denganmu, membenarkan risalahmu. Kami menyaksikan apa yang kamu bawa adalah benar dan kami telah berikan janji serta ikrar untuk mendengar arahan dan taat kepadamu. Oleh itu, teruskan wahai Rasulullah, apa yang kamu mahu. Kami tetap akan bersama kamu. Demi Tuhan yang mengutuskan kamu membawa kebenaran, kalau kamu bentangkan kepada kami laut ini, nescaya kami akan mengharunginya bersama kamu. Tiada seorang pun daripada kami yang akan tercicir. Kami tidak benci untuk bertemu dengan musuh kami esok. Kami adalah kaum yang sabar ketika perang dan jujur (tidak belot) ketika bertemu musuh. Semoga Allah membuatkan sesuatu berlaku di kalangan kami yang menggembirakan kamu. Berangkatlah bersama kami dengan berkat Allah."

The background of the page is a faded image of a mosque interior, showing a large dome and a series of arches. In the top left corner, there is a circular inset image showing a close-up of a dome. On the left side, there is a vertical strip showing a series of arches and columns.

Sahabat yang lain juga berucap seumpama itu. Rasulullah SAW merasa gembira dengan jawapan itu, seraya bersabda:

"Berangkatlah kamu dengan berkat Allah. Bergembiralah. Sesungguhnya Allah telah menjanjikan kepadaku untuk berhadapan dengan salah satu kumpulan; sama ada kafilah dagang ataupun angkatan tentera."

Kemudian Rasulullah SAW berjalan sehingga sampai ke perigi Badar yang paling hampir lalu Baginda berhenti di situ. Lantas al-Hubab bin al-Munzir bertanya: "Wahai Rasulullah! Adakah tempat ini ditetapkan oleh Allah Taala kepada kamu; di mana kamu tidak boleh terkedepan mahupun terkebelakang. Atau ia merupakan buah fikiran, strategi perang dan tipu helah?"

Rasulullah SAW menjawab: "Bahkan ia berdasarkan buah fikiran, strategi perang dan tipu helah"

Maka al-Hubab bin al-Munzir mencadangkan kepada Baginda agar berpindah ke tempat lain yang lebih strategik dan membolehkan orang Islam menyekat air Badar daripada sampai kepada orang musyrik. Oleh itu, Rasulullah SAW dan para sahabat Baginda berangkat sehingga mereka sampai ke tempat yang dicadangkan oleh al-Hubab. Mereka kemudiannya berhenti di situ. Seterusnya, Saad bin Muaz mencadangkan agar dibina sebuah khemah untuk Rasulullah SAW di belakang barisan tentera Islam. Sekiranya Allah memuliakan mereka dengan kemenangan, itulah yang mereka sukai. Jika tewas, Baginda boleh menaiki tunggangannya dan kembali menyertai orang Islam di Madinah. Saad berkata kepada Baginda: "Sebahagian orang Islam tidak hadir bersama kita, wahai Nabi Allah. Ini bukanlah bererti cinta kami terhadapmu lebih hebat berbanding mereka. Jika mereka tahu kamu akan berperang, nescaya mereka tidak tercicir untuk turut serta bersamamu."

Oleh itu, Nabi SAW mendoakan kebaikan untuk Saad bin Muaz. Baginda memerintahkan agar dibina sebuah khemah untuk Baginda. Apabila kedua-dua kumpulan (orang Islam dan orang musyrik) bersemuka, Rasulullah SAW meluruskan barisan orang Islam, membakar semangat mereka untuk berperang dan memotivasi mereka untuk mati syahid. Baginda bersabda:

وَالَّذِي نَفْسِي بِيَدِهِ، لَا يُقَاتِلُهُمُ الْيَوْمَ رَجُلٌ فَيُقْتَلَ صَابِرًا مُحْتَسِبًا مُقْبِلًا غَيْرَ مُدْبِرٍ إِلَّا أَدْخَلَهُ اللَّهُ الْجَنَّةَ

"Demi Tuhan yang jiwaku di dalam genggamannya, sesiapa yang memerangi mereka (tentara orang musyrik) pada hari ini, kemudian dia terbunuh dalam keadaan penuh kesabaran dan ikhlas, terus maju dan tidak lari dari medan pertempuran, pasti Allah akan memasukkannya ke dalam syurga."

Setelah itu Baginda pulang ke khemah bersama Abu Bakar dengan dikawal oleh Saad bin Muaz yang siap menghunuskan pedangnya. Rasulullah SAW mula berdoa. Antara doa Baginda:

اللَّهُمَّ إِنِّي أُنْشِدُكَ عَهْدَكَ وَوَعْدَكَ اللَّهُمَّ إِنَّ تَهْلِكَ هَذِهِ الْعَصَابَةُ مِنْ أَهْلِ الْإِسْلَامِ (الْمُؤْمِنُونَ
الْمُحَارِبُونَ) لَا تُعْبَذُ فِي الْأَرْضِ


"Ya Allah, aku menagih janji dan jaminan-Mu. Ya Allah, jika Engkau binasakan kelompok ini (pejuang-pejuang Mukmin), Engkau tidak akan disembah lagi di muka bumi."

Baginda memanjangkan sujudnya, sehingga Abu Bakar berkata: "Cukuplah. Sesungguhnya Allah akan melaksanakan janji-Nya untukmu."

Kemudian peperangan meletus dan berakhir dengan kemenangan orang Islam. Kira-kira 70 orang musyrik telah terbunuh termasuk ketua mereka yang paling tegar dengan kesyirikannya, Abu Jahal. Turut terbunuh sebahagian pemimpin mereka. Mereka yang ditawan pula kira-kira 70 orang. Baginda telah memerintahkan agar semua yang terbunuh dikebumikan. Baginda pulang ke Madinah dan melakukan syura dengan para sahabat Baginda tentang urusan tawanan perang. Umar mencadangkan supaya mereka dibunuh. Abu Bakar pula mencadangkan supaya mereka menebus diri mereka. Rasulullah SAW menerima cadangan Abu Bakar. Oleh itu, orang musyrik telah menebus tawanan mereka dengan harta.

Terdapat beberapa ayat al-Quran al-Karim telah turun berkenaan Ghazwah Badar ini. Allah Taala berfirman dalam surah Ali Imran:

وَلَقَدْ نَصَرَكُمُ اللَّهُ بِبَدْرٍ وَأَنْتُمْ أَذِلَّةٌ فَاتَّقُوا اللَّهَ لَعَلَّكُمْ تَشْكُرُونَ (123) إِذْ تَقُولُ لِلْمُؤْمِنِينَ أَلَنْ يَكْفِيَكُمْ أَنْ يُمِدَّكُمْ رَبُّكُمْ بِثَلَاثَةِ آلافٍ مِنَ الْمَلَائِكَةِ مُنْزَلِينَ (124) بَلَىٰ إِنْ تَصْبِرُوا وَتَتَّقُوا وَيَأْتُوكُمْ مِنْ فُورِهِمْ هَذَا يُمْدِدْكُمْ رَبُّكُمْ بِخَمْسَةِ آلافٍ مِنَ الْمَلَائِكَةِ مُسَوِّمِينَ (125) وَمَا جَعَلَ اللَّهُ إِلَّا بَشْرًا لَكُمْ وَلِتُحْتَمِنَ قُلُوبُكُمْ بِهِ ۖ وَمَا النَّصْرُ إِلَّا مِنْ عِنْدِ اللَّهِ الْعَزِيزِ الْحَكِيمِ (126)

The background of the page features a large, faint illustration of a mosque. On the left, there is a detailed view of a dome and a minaret. On the right, a larger, more ethereal view of the same mosque structure is visible, serving as a backdrop for the text.

Dan sesungguhnya Allah telah menolong kamu mencapai kemenangan dalam peperangan Badar, sedang kamu berkeadaan lemah (kerana kamu sedikit bilangannya dan kekurangan alat perang). Oleh itu bertaqwalah kamu kepada Allah, supaya kamu bersyukur (akan kemenangan itu). (Ingatlah wahai Muhammad) ketika engkau berkata kepada orang-orang yang beriman (untuk menguatkan semangat mereka): Tidakkah cukup bagi kamu, bahawa Allah membantu kamu dengan 3,000 tentera dari malaikat yang diturunkan?" Bahkan (mencukupi. Dalam pada itu) jika kamu bersabar dan bertaqwa, dan mereka (musuh) datang menyerang kamu dengan serta-merta, nescaya Allah membantu kamu dengan 5,000 malaikat yang bertanda masing-masing. Dan Allah tidak menjadikan bantuan tentera malaikat itu melainkan kerana memberi khabar gembira kepada kamu, dan supaya kamu tenteram dengan bantuan itu. Dan (ingatlah bahawa) pertolongan yang membawa kemenangan itu hanya dari Allah Yang Maha Kuasa, lagi Maha Bijaksana. (Kemenangan Badar itu) kerana Allah hendak membinasakan satu golongan dari orang-orang kafir atau menghina mereka (dengan kekalahan), supaya mereka kembali dengan hampa kecewa. (Ali Imran: 123-127)

Al-Quran juga menegur Rasulullah SAW kerana menerima tebusan harta bagi tawanan perang. Allah Taala berfirman:

مَا كَانَ لِنَبِيٍّ أَنْ يَكُونَ لَهُ أَسْرَىٰ حَتَّىٰ يُنْزِلَ فِي الْأَرْضِ تَرِيدُونَ عَرَضَ الدُّنْيَا وَاللَّهُ يُرِيدُ
الْآخِرَةَ ۗ وَاللَّهُ عَزِيزٌ حَكِيمٌ

Tidaklah patut bagi seseorang Nabi mempunyai orang-orang tawanan sebelum ia dapat membunuh sebanyak-banyaknya di muka bumi. Kamu menghendaki harta benda dunia (yang tidak kekal), sedang Allah menghendaki (untuk kamu pahala) akhirat. Dan (ingatlah), Allah Maha Kuasa, lagi Maha Bijaksana. Kalaulah tidak (kerana) adanya ketetapan dari Allah yang telah terdahulu, tentulah kamu ditimpa azab seksa yang besar disebabkan (penebus diri) yang kamu ambil (dari orang-orang tawanan) itu. (Al-Anfal: 67-68)

PERANG UHUD

Ghazwah Uhud berlaku pada hari Sabtu, 15 Syawal tahun ke-3 Hijrah. Perang ini tercetus kerana kaum Quraisy ingin menuntut bela atas kekalahan mereka dalam Ghazwah Badar. Mereka mempersiapkan angkatan tentera seramai 3,000 orang, termasuk 700 tentera berbaju perisai, 200 pahlawan berkuda, dan 17 wanita, termasuk Hindun binti 'Utbah.

Tentera Quraisy berkhemah di wadi Uhud, bertentangan dengan Madinah. Pada mulanya, Rasulullah SAW berpendapat orang Islam perlu bertahan di dalam kota Madinah. Namun, pemuda-pemuda Islam, terutamanya yang tidak turut serta dalam Ghazwah Badar, bersemangat untuk keluar berperang. Rasulullah SAW mengalah kepada pendapat mereka dan mengenakan baju perisai, lalu memimpin kira-kira 1,000 orang Islam termasuk 100 tentera berbaju perisai dan 2 pahlawan berkuda.

Abdullah bin Ubai bin Salul bersama 300 orang munafik menarik diri, meninggalkan tentera Islam dengan hanya 700 orang. Rasulullah SAW menempatkan 50 pemanah di belakang tentera untuk melindungi daripada serangan balas. Baginda berpesan supaya mereka tidak meninggalkan posisi mereka sehingga diberi arahan.

Pertempuran bermula dengan kemenangan awal bagi pihak Islam. Namun, ketika mereka sibuk mengumpul harta rampasan, pemanah meninggalkan posisi mereka, mengingkari arahan Rasulullah SAW. Khalid bin al-Walid memanfaatkan peluang ini dan menyerang dari belakang.

Keadaan menjadi kacau-bilau, dan tersebar khabar angin bahawa Rasulullah SAW telah terbunuh. Walaupun begitu, Rasulullah SAW bersama beberapa sahabat tetap bertahan. Antara yang mempertahankan Baginda ialah Abu Dujanah, Saad bin Abi Waqqas, dan Nasibah Ummu 'Umarah al-Ansoriyyah. Nasibah mendapat 12 luka parah namun terus bertempur.

Pada saat genting, Rasulullah SAW membunuh Ubai bin Khalaf dengan satu tombakan. Pertempuran akhirnya tamat dengan pihak musyrik mendakwa kemenangan sebagai balasan untuk kekalahan mereka di Badar. Hamzah, bapa saudara Rasulullah SAW, antara yang terbunuh dan mayatnya dikelar oleh Hindun.

Sebanyak 70 orang Islam dan 23 orang musyrik terbunuh. Allah menurunkan ayat dalam surah Ali Imran untuk menyedarkan orang mukmin tentang punca kekalahan dan memberi mereka peringatan.

PERANG BANI NADHIR

Bani Nadhir adalah salah satu suku Yahudi yang tinggal berdekatan dengan kota Madinah dan merupakan sekutu Khazraj. Mereka telah menandatangani perjanjian damai dan kerjasama dengan orang Islam. Namun, sifat jahat dan pengkhianatan yang berakar umbi dalam jiwa mereka mendorong mereka untuk melanggar perjanjian tersebut.

Ketika Rasulullah SAW dan beberapa sahabatnya berada di perkampungan Bani Nadhir, Baginda bersandar di dinding rumah mereka. Tiba-tiba, mereka merancang untuk membunuh Baginda dengan melontarkan batu dari atas rumah. Rasulullah SAW menyadari komplot tersebut dan segera bangun, bergas kembali ke Madinah bersama para sahabatnya.

Baginda kemudian mengutus Muhammad bin Maslamah kepada Bani Nadhir untuk menyampaikan pesan: "Kamu hendaklah keluar dari negaraku. Jangan kamu tinggal di sini lagi. Kamu telah berkhianat." Baginda memberi mereka tempoh 10 hari untuk meninggalkan kampung tersebut.

Bani Nadhir mula bersiap untuk meninggalkan kampung mereka setelah menerima amaran dari Rasulullah SAW. Namun, Abdullah bin Ubai, ketua golongan munafik, menghantar utusan kepada mereka, melarang mereka keluar dan berjanji akan mengirim 2,000 orang untuk mempertahankan mereka. Akibat janji ini, mereka berubah fikiran dan memutuskan untuk bertahan di dalam kubu mereka.

Mereka menghantar utusan kepada Rasulullah SAW, menyatakan: "Kami tidak akan keluar dari kampung halaman kami. Buatlah apa yang kamu mahu." Rasulullah SAW kemudian memimpin para sahabatnya untuk memerangi mereka, dengan Ali bin Abi Talib membawa panji-panji. Ketika tentera Islam tiba, Bani Nadhir merejam mereka dengan panah dan batu. Namun, bantuan yang dijanjikan oleh Abdullah bin Ubai tidak tiba.

Rasulullah SAW mengepung mereka, dan meskipun mereka bertahan dengan gigih, Baginda terpaksa menebang pokok-pokok kurma mereka. Akhirnya, Bani Nadhir bersetuju untuk keluar dari negeri tersebut. Baginda menetapkan syarat agar mereka keluar tanpa membawa senjata dan hanya membawa harta yang mampu dibawa oleh seekor unta. Rasulullah SAW juga menjamin keselamatan darah mereka.

Ketika mereka bersiap untuk keluar, mereka mengambil segala barang yang boleh dibawa dan meruntuhkan rumah-rumah mereka agar orang Islam tidak dapat menggunakannya. Sebahagian dari mereka berhenti menetap di Khaibar, 100 batu dari Madinah, sementara yang lain menetap di Jarsh, selatan Syam. Namun, hanya dua orang dari mereka yang selamat.

Peperangan ini diabadikan dalam surah al-Hasyr yang diturunkan oleh Allah Taala.

Berikut adalah terjemahan tepat ayat al-Quran dari Surah al-Hasyr, ayat 2-4:

هُوَ الَّذِي أَخْرَجَ الَّذِينَ كَفَرُوا مِنْ أَهْلِ الْكِتَابِ مِنْ دِيَارِهِمْ لِأَوَّلِ الْحَشْرِ ۚ مَا ظَنَنْتُمْ أَنْ يَخْرُجُوا
وَوَظَنُوا أَنَّهُمْ مَانِعَتُهُمْ حُصُونُهُمْ مِنَ اللَّهِ فَأَتَاهُمُ اللَّهُ مِنْ حَيْثُ لَمْ يَحْتَسِبُوا ۖ وَقَذَفَ فِي قُلُوبِهِمُ
الرُّعْبَ ۚ يُخْرِبُونَ بُيُوتَهُمْ بِأَيْدِيهِمْ وَأَيْدِي الْمُؤْمِنِينَ فَاعْتَبِرُوا يَا أُولِيَ الْأَبْصَارِ ۚ وَلَوْلَا أَنْ كَتَبَ
اللَّهُ عَلَيْهِمُ الْجَلَاءَ لَعَذَّبَهُمْ فِي الدُّنْيَا وَلَهُمْ فِي الْآخِرَةِ عَذَابُ النَّارِ ۚ ۓ
وَرَسُولُهُ ۖ وَمَنْ يُشَاقِقِ اللَّهَ فَإِنَّ اللَّهَ شَدِيدُ الْعِقَابِ ۚ

Dialah yang mengeluarkan orang-orang kafir di antara Ahli Kitab dari kampung halaman mereka pada julung-julung kali mereka berhimpun hendak memerangi Rasulullah. Kamu (wahai umat Islam) tidak menyangka bahawa mereka akan keluar (disebabkan bilangannya yang ramai dan pertahanannya yang kuat), dan mereka pula menyangka bahawa benteng-benteng mereka akan dapat menahan serta memberi perlindungan kepada mereka (dari azab) Allah. Maka Allah menimpakan (azab-Nya) kepada mereka dari arah yang tidak terlintas dalam fikiran mereka, serta dilemparkan-Nya perasaan cemas takut ke dalam hati mereka, (lalu) mereka membinasakan rumah-rumah mereka dengan tangan mereka sendiri (dari dalam) sambil tangan orang-orang yang beriman (yang mengepung mereka berbuat demikian dari luar). Maka insafilah dan ambillah pelajaran (dari peristiwa itu) wahai orang-orang yang berakal fikiran serta celik mata hatinya.

Dan kalaulah tidak kerana Allah telah menetapkan pengusiran (yang demikian buruknya) terhadap mereka, tentulah Dia akan menyeksa mereka di dunia; dan mereka pula akan beroleh azab seksa neraka pada hari akhirat kelak. (Mereka ditimpakan azab) yang demikian, kerana mereka menentang (perintah) Allah dan Rasul-Nya. Dan (ingatlah), sesiapa yang menentang (perintah) Allah, maka sesungguhnya Allah amatlah berat azab seksa-Nya.

GHAZWAH AL-AHZAB

Ghazwah al-Ahzab, juga dikenali sebagai Ghazwah Khandak, berlaku pada bulan Syawal tahun ke-5 Hijrah. Sebab utama perang ini ialah setelah Bani Nadhir diusir, beberapa ketua mereka pergi ke Makkah untuk menghasut dan mengapi-apikan kaum Quraisy supaya memerangi Rasulullah SAW. Kaum Quraisy menyahut seruan ini. Kemudian, pemimpin-pemimpin Yahudi tersebut pergi ke Ghatfan dan mengajak Bani Fazzarah, Bani Murrah, dan Bani Asyjak untuk bergabung dalam usaha ini. Semua pihak ini kemudian berangkat menuju ke Madinah dengan tujuan menyerang kaum Muslimin.

Apabila Rasulullah SAW mendengar tentang kedatangan tentera bersekutu ini, Baginda bermesyuarat dengan para sahabat. Salman al-Farisi mencadangkan supaya mereka menggali parit di sekeliling Madinah sebagai langkah pertahanan. Rasulullah SAW menerima cadangan ini dan memerintahkan supaya parit-parit tersebut digali. Baginda sendiri turut serta dalam kerja-kerja penggalian.

Setibanya tentera Quraisy dan sekutu mereka, mereka terkejut melihat parit-parit yang tidak pernah mereka lihat sebelum ini dalam peperangan Arab. Bilangan tentera bersekutu Quraisy adalah sekitar 10,000 orang, manakala bilangan kaum Muslimin hanya sekitar 3,000 orang. Huyai bin Akhtob, salah seorang Yahudi yang berperanan besar dalam menghasut Quraisy dan sekutunya, pergi menemui Kaab bin Asad, pemimpin Bani Quraizah, untuk memujuknya melanggar perjanjian damai dengan orang Islam.

Nabi SAW berfikir untuk berdamai dengan Bani Quraizah dengan menawarkan satu pertiga hasil buah-buahan Madinah kepada mereka. Namun, kaum Ansar, dengan semangat mempertahankan agama mereka, menolak untuk tunduk kepada Bani Quraizah yang telah berkhianat.

Pertempuran bermula apabila beberapa pahlawan berkuda musyrik berjaya melepasi parit di satu bahagian yang sempit, dan orang Islam bertempur dengan mereka. Pada saat genting itu, Nu'aim bin Mas'ud bin 'Amir, yang telah memeluk Islam tanpa pengetahuan kaumnya, datang bertemu Rasulullah SAW. Beliau merupakan kawan kepada Bani Quraizah dan dipercayai oleh mereka. Rasulullah SAW bersabda kepadanya, "Di kalangan kita, kamu hanyalah seorang sahaja. Oleh itu, sekiranya kamu dapat, lakukanlah sesuatu untuk mengalahkan musuh. Sesungguhnya perang adalah tipu daya."

A vertical strip on the left side of the page shows a mosque interior with a large white dome and arched windows. The main background is a faded image of a crowd of people in traditional Islamic attire.

Nu'aim menggunakan kelicikannya untuk memecahbelahkan pakatan Quraisy dan sekutunya dengan Bani Quraizah. Beliau menimbulkan prasangka dalam hati setiap kumpulan terhadap kumpulan lain. Allah kemudian menghantar angin kencang pada malam yang amat sejuk, menyebabkan periuk-periuk bertaburan dan khemah-khemah mereka terkoyak. Jiwa tentera bersekutu diselubungi rasa takut, dan mereka berangkat pulang pada malam itu juga. Apabila pagi tiba, kaum Muslimin tidak mendapati seorang pun tentera musyrik yang masih berada di situ.

Dalam peperangan ini, Allah menurunkan beberapa ayat dalam Surah al-Ahzab untuk mengingatkan dan memberi pengajaran kepada kaum Muslimin. Allah berfirman dalam ayat 9-11, yang menceritakan bagaimana tentera bersekutu dihancurkan dengan angin ribut dan malaikat, serta bagaimana hati kaum Muslimin diuji dengan guncangan yang dahsyat.

Allah juga menurunkan ayat 22-25 yang menerangkan sikap golongan munafik yang tidak membantu dan menarik diri dari medan pertempuran, serta mengingatkan tentang orang-orang mukmin yang teguh dengan janji mereka kepada Allah. Allah menyelamatkan orang-orang yang beriman dan menghalau tentera kafir dengan keadaan geram dan marah kerana gagal. Allah Maha Kuat lagi Maha Kuasa.

GHAZWAH BANI QURAIZAH

Ghazwah Bani Quraizah berlaku pada tahun ke-5 Hijrah, sejurus selepas berakhirnya Ghazwah al-Ahzab (Ghazwah Khandak). Beberapa sebab utama mendorong kepada peperangan ini. Rasulullah SAW menyaksikan pengkhianatan Bani Quraizah yang berpihak kepada Quraisy dan sekutunya semasa pertempuran Ghazwah al-Ahzab. Pada saat-saat genting itu, mereka membatalkan perjanjian damai dengan Rasulullah SAW dan berniat untuk melakukan jenayah yang boleh melenyapkan semua orang Islam yang tinggal bersama mereka di Madinah.

Selepas tentera bersekutu Quraisy meninggalkan Madinah tanpa mengalahkan orang Islam, Rasulullah SAW memutuskan untuk mengambil tindakan terhadap pengkhianatan Bani Quraizah. Baginda ingin membersihkan Madinah daripada mereka untuk mencegah sebarang pengkhianatan di masa depan yang boleh membahayakan orang Islam. Sifat pengkhianatan dan kelicikan Bani Quraizah adalah sebahagian daripada sikap mereka yang sama seperti kebiasaan suku-suku Yahudi yang lain.

Diriwayatkan dalam Sahih al-Bukhari oleh Aishah RA, bahawa selepas Rasulullah SAW pulang dari Ghazwah Khandak, Baginda meletakkan senjata dan mandi. Ketika itu, Jibril datang dengan kepala berdebu, berkata: "Kamu telah meletakkan senjata? Demi Allah, aku belum meletakkannya." Baginda bertanya: "Di mana?" Jibril menjawab: "Di sana," sambil menunjuk ke arah Bani Quraizah.

Aishah berkata: "Maka Rasulullah SAW keluar untuk memerangi mereka." Rasulullah SAW mengarahkan seorang sahabat menyeru orang ramai supaya tiada seorang pun dari mereka bersembahyang Asar melainkan di perkampungan Bani Quraizah. Baginda keluar bersama mereka dengan panji-panji dibawa oleh Saidina Ali RA. Tentera Islam terkumpul seramai 3,000 orang dengan 36 ekor kuda.

Apabila Ali RA menghampiri kubu Bani Quraizah, dia mendengar ucapan yang buruk tentang Rasulullah SAW dan isteri-isteri Baginda. Ali memberitahu perkara itu kepada Nabi SAW dan meminta Baginda agar tidak menghampiri Bani Quraizah yang keji itu. Baginda SAW menjawab bahawa apabila mereka melihat Baginda, mereka tidak akan memperkatakan sesuatu yang buruk kerana sikap berpura-pura mereka.

Tentera Islam mengepung Bani Quraizah selama 25 malam. Setelah mereka tersepit, mereka tunduk kepada hukuman Rasulullah SAW. Mereka dihakimi oleh Saad bin Muaz, penghulu kaum Aus, yang merupakan sekutu Bani Quraizah. Saad menghukum pejuang-pejuang mereka untuk dibunuh, zuriat mereka dijadikan tawanan, dan harta-harta mereka dibahagi-bahagikan. Rasulullah SAW melaksanakan hukuman itu, menghapuskan konspirasi dan pengkhianatan Yahudi di Madinah.

Dalam peperangan ini, turun ayat-ayat al-Quran yang menjelaskan pembelotan Yahudi, pelanggaran mereka terhadap perjanjian, dan sikap mereka yang tidak menolong orang Islam dalam Ghazwah al-Ahzab, iaitu Surah al-Ahzab ayat 13-16:

"Dan juga masa itu ialah masa segolongan di antara mereka berkata: 'Wahai penduduk Yathrib, tempat ini bukan tempat bagi kamu (untuk berjuang di sini), oleh itu balikkah'. Dan sebahagian dari mereka pula meminta izin kepada Nabi (hendak balik) sambil berkata: 'Sesungguhnya rumah-rumah kami memerlukan perlindungan', pada hal ia tidak memerlukan perlindungan. Mereka hanya bertujuan hendak melarikan diri (dari berjuang menegakkan Islam). Dan kalaulah tempat-tempat kediaman mereka itu diserang oleh musuh dari segala penjurunya, kemudian mereka diajak berpaling tadah menentang Islam, sudah tentu mereka akan melakukannya, dan mereka tidak bertanggung lagi tentang itu melainkan sebentar sahaja. Pada hal sesungguhnya mereka telahpun mengikat janji dengan Allah sebelum itu, iaitu mereka tidak akan berpaling undur (dari medan perang yang mereka hadiri). Dan (ingatlah) janji setia dengan Allah itu akan ditanya kelak (tentang penyempurnaannya). Katakanlah (wahai Muhammad): 'Kalaulah kamu melarikan diri dari kematian atau dari pembunuhan maka perbuatan melarikan diri itu tidak sekali-kali mendatangkan faedah kepada kamu; dan kalaulah kamu pada hari ini terlepas sekalipun, maka kamu tidak juga akan menikmati kesenangan hidup melainkan sedikit masa sahaja'."

Allah juga berfirman dalam Surah al-Ahzab, ayat 26-27:

وَأَنْزَلَ الَّذِينَ ظَاهَرُوهُمْ مِنْ أَهْلِ الْكِتَابِ مِنْ صَيَاصِيهِمْ وَقَذَفَ فِي قُلُوبِهِمُ الرُّعْبَ فَغَارَ فَرِيقًا تَقْتُلُونَ
وَتَأْسِرُونَ فَرِيقًا ۚ وَأَوْرَثَكُمْ أَرْضَهُمْ وَدِيَارَهُمْ وَأَمْوَالَهُمْ وَأَرْضًا لَمْ تَطَّوْهَا ۚ وَكَانَ اللَّهُ عَلَى كُلِّ
شَيْءٍ قَدِيرًا ٢٧

"Dan Dia menurunkan golongan Ahli Kitab (kaum Yahudi) yang membantu tentera musuh itu, dari benteng-benteng mereka (menyerah diri), setelah diisikan-Nya hati mereka dengan perasaan gerun. (Lalu mereka diadili dan dijatuhkan hukuman); sebahagian di antara-nya kamu bunuh, dan sebahagian lagi kamu tawan. Dan Dia menjadikan kamu mewarisi tanah-tanah dan rumah-rumah serta harta benda mereka, dan juga tanah-tanah (di negeri-negeri lain) yang belum kamu menjejaknya. Dan (ingatlah) adalah Allah Maha Kuasa atas tiap-tiap sesuatu."

Dengan itu, konspirasi, adu domba, dan komplot Yahudi di Madinah dan sekitarnya terhadap Rasulullah SAW dan dakwahnya telah dihapuskan.

SESI KEEMPAT

PEPERANGAN AKHIR DAN PENGUKUHAN NEGARA ISLAM

1. HASIL PEMBELAJARAN:

- Mengenal pasti Mengenal pasti peristiwa-peristiwa penting dalam peperangan akhir yang dilalui oleh Rasulullah SAW seperti Ghazwah al-Hudaibiyah, Ghazwah Khaibar, Ghazwah Mu'tah, dan Ghazwah al-Fath.
- Memahami peranan penting strategi diplomatik seperti Perjanjian Hudaibiyah dalam memperkuat kedudukan Islam dalam kalangan musuh dan menjadikan perjanjian ini sebagai platform penyebaran Islam secara aman.
- Mengenal pasti pengajaran dan nilai-nilai penting daripada peperangan ini, seperti ketabahan, kebijaksanaan dalam membuat keputusan, dan pentingnya perpaduan dalam menghadapi cabaran besar.

2. ISI KANDUNGAN UTAMA:

- Pendahuluan
- Ghazwah al-Hudaibiah
- Ghazwah Khaibar
- Ghazwah Mu'tah
- Ghazwah al-Fath
- Ghazwah Hunain
- Ghazwah Tabuk
- Penutup

GHAZWAH AL-HUDAIBIAH

Ghazwah al-Hudaibiyyah berlaku pada bulan Zulkaedah, tahun ke-6 hijrah. Antara latar belakang peristiwa ini, Rasulullah SAW telah bermimpi bahawa Baginda memasuki Baitullah al-Haram bersama para sahabatnya dalam keadaan aman dan bercukur kepala atau memotong rambut. Mereka tidak merasa takut kepada sesuatu. Maka Baginda memerintah orang ramai bersiap keluar ke Makkah bagi mengerjakan umrah dan bukan untuk berperang dengan Quraisy.

Muhajirin dan Ansor telah keluar bersama Baginda didorong oleh rasa rindu untuk melihat Baitullah al-Haram setelah dihalang berbuat demikian selama enam tahun. Rombongan tersebut turut disertai oleh Arab Badwi. Baginda SAW meletakkan di hadapannya "Hadyu" iaitu unta dan binatang ternakan korban yang dibawa ke Baitullah al-Haram sebagai mengagung dan memuliakannya. Baginda telah berihram di satu tempat bernama Zul Hulaifah agar orang ramai khususnya Quraisy mengetahui bahawa Baginda bukan mahu berperang.

Bilangan mereka yang keluar bersama Baginda kira-kira 1,500 orang. Mereka tidak keluar membawa senjata kecuali senjata bagi para pengembara pada zaman tersebut iaitu pedang yang bersarung. Baginda berjalan sehingga sampai di Ushfan. Seorang lelaki datang memberitahu Baginda: "Quraisy telah mendengar kedatanganmu. Oleh itu, mereka telah keluar dengan memakai (kulit harimau seraya bersumpah dengan nama Allah, bahawa kamu tidak akan sekali-kali masuk ke Makkah". Maka Baginda SAW bersabda:

"Hai kasihannya Quraisy, mereka mabuk perang! Apa yang akan menimpa mereka, jika mereka membiarkan aku berurusan dengan semua orang Arab?! Sekiranya bangsa Arab mencederakan aku, itulah yang mereka mahukan. Sekiranya Allah memenangkan aku ke atas bangsa Arab, mereka boleh memasuki Islam beramai-ramai. Kalau Quraisy tidak mahu berbuat demikian, mereka boleh berperang. Mereka mempunyai kekuatan. Apa yang Quraisy sangkakan? Demi Allah, aku akan terus berjuang demi agama yang Allah utuskan aku, sehingga Dia memenangkannya, atau urat tengkuk ini bercerai (aku mati)".

The background of the page is a large, faded image of a mosque interior, showing a series of arches and columns. In the top left corner, there is a smaller, circular inset image showing a close-up of a dome and minaret structure.

Apabila Baginda sampai di Hudaibiyyah (satu tempat berhampiran Makkah dan sekarang ini terletak antara kota itu dengan jalan Jeddah), beberapa orang lelaki daripada bani Khuzaah datang menemui Baginda bertanyakan sebab kedatangan. Baginda memberitahu bahawa Baginda hanya datang untuk menziarahi Baitullah dan mengerjakan umrah.

Lalu mereka pulang dan memberitahu Quraisy: "Kamu tergopoh-gapah terhadap Muhammad. Dia tidak datang untuk berperang, bahkan datang hanya untuk menziarahi Baitullah ini."

Quraisy berkata: "Tidak. Demi Allah (kami tidak akan benar) dia memasuki Makkah untuk menguasai kami secara kekerasan buat selama-lamanya. Dan orang Arab tidak menuduh sedemikian terhadap kami." Kemudian Quraisy menghantar Urwah bin Mas'ud at-Thaqafi untuk berunding dengan Rasul SAW tentang perkara tersebut. Selepas perbincangan, dan selepas berlaku beberapa peristiwa antara Urwah dengan sebahagian sahabat, dia pulang menemui Quraisy lalu menceritakan apa yang dilihat.

Dia menceritakan bagaimana kecintaan para sahabat kepada Rasulullah SAW. Mereka begitu hormat kepada Baginda dan cenderung untuk melakukan perdamaian. Namun Quraisy enggan menerimanya. Kemudian Rasul SAW mengutus Othman bin Affan menemui penduduk Makkah untuk menegaskan kepada mereka tujuan kedatangan Baginda SAW dan para sahabat.

Othman terlewat pulang lalu tersebar berita di kalangan orang Islam bahawa beliau telah dibunuh. Ketika itu, Rasul SAW berkata: "Kita tidak akan berganjak sehingga kita memerangi kaum tersebut."

Baginda mengajak orang Islam berbai'ah untuk berjihad dan mati syahid di jalan Allah. Mereka telah berbai'ah dengan Baginda di bawah sebatang pokok "Tolh" (pokok acacia). Mereka berjanji tidak lari dari medan; penentuannya sama ada diadakan perdamaian ataupun mati syahid. Apabila Quraisy mengetahui berita bai'ah tersebut, mereka merasa takut. Pada pandangan mereka, perdamaian bersyarat dengan Baginda perlu dilakukan.

Baginda dikehendaki pulang ke Madinah pada tahun itu dan datang kembali pada tahun depan. Baginda hanya dibenarkan bermukim selama tiga hari di Makkah dengan hanya membawa senjata biasa seperti tombak dan pedang yang tersarung. Untuk itu, Quraisy mengutuskan Suhail bin 'Amru bagi menyempurnakan perdamaian tersebut. Akhirnya perdamaian dimeterai mengikut kemahuan Quraisy. Berlaku gencatan senjata di antara kedua-dua pihak selama 10 tahun.

A vertical strip on the left side of the page shows a detailed view of a mosque's interior, featuring a large dome and intricate architectural details.

Perdamaian Hudaibiyyah juga memutuskan, sesiapa yang datang daripada pihak Muhammad ke Makkah, mereka tidak memulangkannya, sementara sesiapa yang datang kepada Muhammad dari Makkah, mereka perlu memulangkannya. Perkara tersebut begitu sukar diterima oleh orang Islam. Sebahagian mereka berbahas dengan Nabi SAW berkenaan syarat-syarat tersebut. Antara mereka yang paling keras menentang ialah Umar, Sehingga Rasulullah SAW bersabda:

"Aku adalah hamba Allah. Dia tidak akan mempersia-siakan aku".

Kemudian Rasul memerintahkan para sahabat melakukan tahallul (langkah-langkah keluar daripada ikatan ihram) umrah. Namun, mereka tidak melakukannya ekoran terlalu kesal, setelah dihalang memasuki Makkah. Mereka juga sukar untuk menerima syarat-syarat perdamaian tersebut.

Oleh itu, Baginda SAW mengambil inisiatif memulakannya sendiri. Lalu Baginda bertahallul daripada umrah. Lantas tindakan Baginda itu diikuti oleh semua orang Islam. Namun selepas itu, syarat-syarat yang sukar diterima oleh orang Islam tetapi diredhai oleh Rasul SAW ternyata memberi faedah besar. Ini tercapai kerana Baginda berpandangan jauh, berfikiran tajam dan mendapat bantuan wahyu sehingga membolehkan Baginda berfikir dan bertindak dengan tepat.

GHAZWAH KHAIBAR

Ghazwah Khaibar berlaku pada akhir Muharram, tahun ke-7 hijrah. Khaibar merupakan sebuah oasis besar yang didiami oleh Yahudi. Terletak 100 batu di utara Madinah menghala ke Syam. Sebab berlaku peperangan ini:

Setelah Nabi SAW memperolehi keamanan daripada pihak Quraisy hasil perdamaian yang dicapai di Hudaibiyyah, Baginda memutuskan untuk membersihkan saki baki Yahudi di sekeliling Madinah. Tindakan ini diambil setelah Yahudi dibersihkan daripada Kota Madinah. Yahudi di Khaibar mempunyai kubu-kubu yang kukuh.

Di dalamnya terdapat kira-kira 10,000 orang pejuang. Mereka juga mempunyai kemampuan senjata dan peralatan yang besar di samping terkenal sebagai pakar muslihat, permainan kotor dan tipudaya. Oleh itu, masalah ini perlu dibersihkan segera sebelum mereka menjadi punca kekacauan dan kebimbangan orang Islam di ibu kota mereka, Madinah.

Dengan ini, Rasul SAW bersepakat untuk keluar memerangi mereka pada akhir Muharram. Baginda keluar memerangi mereka dalam satu angkatan seramai 1,600 orang pejuang termasuk 200 orang pahlawan berkuda. Baginda telah mengumumkan panggilan perang kepada para sahabat yang menyertai Baginda dalam Ghazwah Hudaibiyyah sebelum ini.



Apabila sampai di Khaibar, Nabi SAW berpangkalan hampir dengan salah satu kubu Khaibar bernama Hisn an-Natoh. Yahudi telah menghimpunkan pejuang-pejuang mereka di dalamnya. Hubab bin al-Munzir mencadangkan agar angkatan tentera Islam berpindah tempat, kerana dia cukup kenal dengan penduduk an-Natoh. Mereka terkenal dengan panahan yang jauh dan tepat apatah lagi kedudukan mereka terletak lebih tinggi daripada kedudukan orang Islam. Oleh itu, anak-anak panah mereka lebih cepat meluncur turun mengenai barisan tentera Islam. Mereka juga boleh menyerang hendap orang Islam pada waktu malam dengan berselindung di celah-celah pokok-pokok kurma yang banyak.



Oleh demikian, Rasul SAW bersama tentera Islam mengambil langkah berpindah ke tempat yang lain. Pertempuran kemudiannya bermula dan orang Islam membuka satu demi satu kubu kecuali dua kubu terakhir. Penduduk kedua kubu tersebut mahu berdamai dengan syarat darah pejuang-pejuang mereka terpelihara dan zuriat mereka dilepaskan (tidak dijadikan tawanan). Mereka juga meletakkan syarat agar mereka dibenarkan keluar dari bumi Khaibar bersama-sama zuriat. Mereka setuju keluar dengan hanya sehelai sepinggang. Baginda SAW berdamai dengan mereka dengan syarat-syarat tersebut. Sekiranya mereka menyembunyikan sesuatu ketika keluar dari kubu tersebut, perlindungan Allah dan rasul-Nya terbatal. Mereka kemudiannya meninggalkan kedua-dua kubu tersebut. Orang Islam mendapati di dalam kedua-dua kubu tersebut terdapat senjata yang banyak dan lembaran-lembaran Taurat. Yahudi telah datang menuntut kitab tersebut. Baginda mengarahkan agar ia dipulangkan kepada mereka. Bilangan Yahudi yang terbunuh dalam peperangan ini seramai 93 orang sementara orang Islam yang syahid seramai 15 orang.

GHAZWAH MU'TAH

Ghazwah Mu'tah berlaku pada Jamadil Awal, tahun ke-8 hijrah. Mu'tah merupakan sebuah kampung di pinggir Syam. Sekarang ia dinamakan dengan al-Karak. Letaknya ditenggara Laut Mati.

Sebab peperangan ini; Rasul SAW telah mengutus al-Harith bin Umair al-Azdi Beliau membawa sepucuk surat kepada al-Harith bin Abi Syamir al-Ghassani, Raja Basrah yang menjadi wakil Herkules. Dalam surat itu, Baginda SAW mengajaknya kepada Islam (ia merupakan antara surat yang diutuskan oleh Baginda s.a.w. kepada maharaja-maharaja dunia dan raja-raja Arab. Perutusan ini dilakukan selepas perdamaian Hudaibiyyah). Apabila utusan Baginda tiba di Mu'tah, salah seorang raja Arab Ghassan yang tunduk kepada Caesar Rom bertanya kepadanya: "Kamu mahu pergi ke mana? Boleh jadi kamu salah seorang utusan Muhammad?" Lantas utusan Baginda s.a.w. menjawab: "Ya." Lalu raja tersebut mengikat dan memenggal lehernya. Berita pembunuhan tersebut sampai kepada Rasulullah SAW. Baginda merasa amat sedih kerana tiada utusan Baginda yang dibunuh selain daripada beliau. Baginda mempersiapkan satu angkatan tentera Islam seramai 3,000 orang. Baginda melantik Zaid bin Harithah sebagai panglima mereka. Baginda berpesan, sekiranya Zaid mati syahid, mereka hendaklah melantik Jaafar bin Abi Tolib (sebagai penggantinya). Sekiranya Jaafar pula mati syahid, mereka hendaklah melantik Abdullah bin Rawwahah (sebagai pengganti seterusnya). Baginda mengarahkan Zaid mara ke tempat pembunuhan al-Harith bin Umair (di Mu'tah) dan menyeru penduduk di sana kepada Islam. Sekiranya mereka menolak seruan tersebut, tentera Islam hendaklah memohon pertolongan Allah dan memerangi mereka.

Kemudian angkatan tentera Islam berangkat dengan mengharapkan keberkatan Allah. Rasul SAW sendiri telah menghantar mereka berlepas (dari Madinah). Mereka terus berjalan sehingga sampai ke Ma'an. Di sana, mereka mendapat berita bahawa Herkules telah menghimpunkan satu angkatan tentera yang besar. Angkatan tersebut telah berpangkalan di Maab, salah sebuah kampung al-Balqak (kawasan perkampungan yang dibangunkan oleh Damsyik. Kotanya dikenali dengan Amman). Mereka terdiri daripada bangsa Rom dan Arab yang menganut agama Nasrani.

Orang Islam telah bermesyuarat sesama mereka. Mereka berpandangan untuk meminta bantuan daripada Rasulullah SAW atau Baginda memberi arahan lain untuk mereka lakukan. Namun Abdullah bin Rawwahah membangkang seraya berkata: "Demi Allah, peperangan yang kamu benci ini merupakan tujuan sebenar kamu keluar. Kamu mengejar mati syahid. Kita tidak memerangi manusia berdasarkan bilangan, kuantiti yang ramai mahupun kekuatan. Kita memerangi mereka hanya berbekalkan agama yang Allah muliakan kita dengannya. Sesungguhnya kesudahan perang ini hanya salah satu daripada dua kebaikan: sama ada kemenangan ataupun mati syahid."

A vertical strip on the left side of the page shows a mosque interior with a large dome and arched windows. The main background of the page is a faded image of a mosque interior with a large dome and arched windows.

Oleh itu, orang ramai bersetuju dengan beliau untuk memasuki kancah pertempuran. Seterusnya, peperangan bermula. Zaid telah berperang sehingga syahid. Kemudian Jaafar bin Abi Tolib menerima panji-panji angkatan tentera Islam menggantikan beliau. Jaafar pada mulanya berperang di atas kudanya kemudian terpaksa turun dan berperang dengan berjalan kaki. Tangan kanannya telah terpotong, lantas dia memegang panji-panji Islam dengan tangan kirinya. Kemudiannya tangan kirinya pula terpotong. Lalu dia memeluk panji-panji itu sehingga akhirnya beliau turut syahid. Pada mayat beliau, terdapat lebih daripada 70 kesan luka antara tetakan pedang ataupun tikaman lembing. Kemudian Abdullah bin Rawwahah mengambil panji-panji tersebut dan berperang sehingga dia turut syahid.

Setelah itu orang Islam bersepakat melantik Khalid bin al-Walid sebagai panglima tentera (ini adalah peperangan pertama yang beliau sertai setelah memeluk Islam). Beliau menggunakan kelicikan perangnya sehingga berjaya menyelamatkan angkatan tentera Islam daripada binasa.

Dia pulang bersama-sama angkatan tentera Islam itu ke Madinah. Pertempuran ini merupakan pertempuran pertama yang dilalui oleh orang Islam diluar semenanjung-tanah Arab untuk melawan Rom. Ia dinamakan sebagai Ghazwah sekalipun tidak dihadiri oleh Rasul s.a.w. kerana ramai bilangan pejuang yang terlibat dalam peperangan ini mencecah sehingga 3,000 orang. Ini berbeza dengan bilangan tentera dalam sariyyah-sariyyah yang lain. Rasulullah s.a.w. telah menggelarkan Khalid bin al-Walid dalam peperangan inidengan gelaran "Saifullah" (Pedang Allah).

GHAZWAH AL-FATH

Ghazwah al-Fath merupakan peperangan membuka kota Makkah. Ia berlaku pada Ramadan, tahun ke-8 hijrah.

Sebabnya; perdamaian Hudaibiyyah membolehkan mana-mana kabilah Arab melakukan pakatan dengan Rasulullah s.a.w. jika mereka mahu. Mereka juga bebas untuk melakukan pakatan dengan Quraisy. Bani Bakar telah bersetuju untuk melakukan Pakatan dengan Quraisy, sementara Khuzaah bersetuju melakukan pakatan dengan Rasulullah SAW.

Pada tahun ke-8 hijrah, Bani Bakar melakukan pencerobohan ke atas Khuzaah. Mereka membunuh kira-kira 20 orang lelaki daripada Khuzaah. Quraisy turut terlibat membekalkan harta dan senjata kepada Bani Bakar. Apabila berita itu sampai kepada Rasul SAW, Baginda merasa amat marah, lantas mempersiapkan tentera Islam untuk memerangi Quraisy. Namun Baginda tidak mahu memberitahu orang ramai hala tuju tenteranya, supaya Quraisy tidak bersiap sedia. Jika Quraisy membuat persiapan menghadapi tentera Islam, ia akan mengakibatkan kehormatan Tanah Haram tercemar dan serata ceruknya akan dipenuhi cebisan-cebisan mayat (ramai nyawa yang terkorban).



Hatib bin Abi Baltaah al-Badariy telah mengutus surat secara rahsia ke Makkah, memberitahu penduduk Makkah berkenaan kedatangan Rasul SAW untuk menyerang mereka. Namun, Allah telah memberitahu Rasul-Nya tentang surat tersebut. Baginda menghantar beberapa orang sahabatnya mengejar wanita yang membawa surat itu untuk memeriksanya. Mereka akhirnya menemui surat tersebut. Oleh itu, Rasul SAW memanggil Hatib, seraya bersabda: "Apa yang mendorong kamu melakukan perbuatan ini?" Hatib menjawab: "Wahai Rasulullah, demi Allah, aku beriman dengan Allah dan Rasul-Nya. Aku tidak berubah atau menukar imanku. Namun, aku seorang lelaki yang tidak mempunyai asal-usul dan hubungan kekeluargaan dalam kaum itu (Quraisy). Sedangkan aku mempunyai anak dan keluarga yang tinggal dengan mereka. Oleh itu, aku berbuat baik dengan mereka untuk keselamatan kaum keluargaku."


Lantas Umar berkata: "Wahai Rasulullah, biarkan aku penggal lehernya. Sesungguhnya lelaki ini telah munafik." Rasulullah SAW berkata kepada Umar: "Dia telah terlibat dalam Ghazwah Badar. Kamu tidak tahu, boleh jadi Allah memerhati ahli-ahli Badar, lalu Dia berfirman: Lakukanlah apa yang kamu mahu. Sesungguhnya Aku telah mengampunkan kamu."

Rasul SAW telah bertolak daripada Madinah pada 10 Ramadan. Dalam perjalanan tersebut Baginda telah berbuka puasa. Tindakan tersebut diikuti oleh orang ramai, ekoran kepenatan dan kesusahan yang mereka hadapi dalam perjalanan. Bilangan mereka Ketika keluar dari Madinah seramai 10,000 orang. Dalam perjalanan beberapa kabilah Arab bergabung dengan mereka.

Ketika di Marr az-Zohron, pengawal-pengawal Rasulullah SAW terserempak dengan Abu Suffian bersama dua orang temannya. Lalu para pengawal Baginda menahan dan membawa mereka menghadap Nabi SAW. Kemudian Abu Suffian memeluk Islam. Al-Abbas (Rasulullah telah menemuinya di pertengahan jalan. Al-Abbas ketika itu sedang menuju ke Madinah untuk berhijrah dan memeluk Islam) berkata: Abu Suffian seorang lelaki yang cintakan kemegahan. Anugerahkan kepadanya sesuatu yang boleh dibanggakannya. Maka Rasulullah bersabda: "Sesiapa yang masuk ke dalam rumah Abu Suffian, dia mendapat keamanan."

Kemudian tentera Islam sampai di Makkah. Penyeru Rasulullah s.a.w. mengisytiharkan: "Sesiapa yang masuk ke rumahnya dan mengunci pintu, dia mendapat keamanan. Sesiapa yang memasuki masjid, dia mendapat keamanan. Sesiapa yang masuk ke dalam rumah Abu Suffian, dia juga mendapat keamanan." Namun, terdapat 15 orang lelaki yang melakukan jenayah besar terhadap Islam dan Rasulullah telah dikecualikan daripada jaminan keamanan tersebut.

Kemudian Rasulullah SAW memasuki Mekkah dengan menaiki tunggangannya. Baginda masuk Makkah dalam keadaan tunduk sehingga dahinya hampir-hampir menyentuh pelana tunggangannya, sebagai tanda bersyukur kepada Allah di atas kemenangan yang paling besar itu. Selepas itu Rasul SAW tawaf di Baitullah dan menghapuskan berhala-berhala di sekelilingnya yang mencapai bilangan 360 buah. Kemudian Baginda memasuki Kaabah dan bersembahyang dua rakaat di dalamnya.



Setelah selesai, Baginda berdiri di muka pintu Kaabah, sementara Quraisy mengintai-ngintai apakah yang akan diperbuat oleh Baginda kepada mereka. Antara kata-kata Baginda ketika itu ialah: "Wahai sekalian Quraisy, apakah yang kamu sangka aku akan lakukan kepada kamu?" Mereka menjawab: "Kebaikan, Kamu saudara yang mulia dan anak kepada saudara yang mulia." Maka Rasulullah s.a.w. bersabda: "Pada hari ini, aku katakan kepada kamu sebagaimana kata-kata saudaraku, Yusuf sebelum ini: "Kamu pada hari ini tidak akan ditempelak atau disalahkan (tentang perbuatankamu yang telah terlanjur itu), semoga Allah mengampunkan dosa kamu, dan Dia lah jua Yang Maha Mengasihani daripada segala yang lain yang mengasihani." (Yusuf: 92). Pergilahkamu. Kamu semua dibebaskan."

Kemudian orang ramai berhimpun di sekitar bukit Sofa untuk berbaiah dengan Rasulullah SAW di atas nama Islam. Rasul s.a.w, duduk mengadap mereka di atas bukit Sofa. Baginda mengambil baiah dengan janji untuk mendengar dan taat kepada Allah dan Rasul-Nya sedaya upaya mereka. Kaum lelaki telah melakukan baiah terlebih dahulu, kemudian diikuti oleh wanita. Baginda tidak berjabat tangan dengan mana-mana wanita dikalangan mereka. Di antara wanita yang berbaiah ialah Hindun, isteri Abu Suffian. Hindun tergolong di kalangan orang yang telah dihalalkan darahnya oleh Baginda pada hari pembukaan Makkah. Namun, apabila Baginda mengetahui beliau turut serta dalam baiah tersebut, Baginda memaafkan beliau disebabkan baiah yang dilakukannya itu. Pada hari pembukaan Makkah tersebut, Rasulullah SAW memerintahkan Bilal agar melaungkan azan solat Zohor di atas Kaabah. Quraisy yang hadir terkejut besar dengan perbuatan tersebut. Ketika itu mereka belum memeluk Islam lagi. Namun Rasulullah SAW ingin perbuatan itu dilakukan dengan sengaja kerana ia mengandungi rahsia yang besar dan hikmah yang agung.

GHAZWAH HUNAIN

Ghazwah Hunain berlaku pada 10 Syawal tahun ke-8 hijrah, beberapa hari selepas pembukaan Makkah.

Sebabnya; apabila Allah membuka Mekkah untuk Rasul-Nya, pemimpin-pemimpin Hawazin dan Thaqif menyangka setelah Rasulullah SAW menyelesaikan masalah di Makkah, Baginda akan menghalakan serangan kepada mereka pula. Lantaran itu, mereka berazam untuk memulakan dahulu peperangan dengan Baginda.

A detailed illustration of a domed structure, possibly a shrine or a part of a mosque, with intricate architectural details and a large central dome.

Mereka telah melantik Malik bin Auf sebagai ketua. Pada hari tersebut dia baru berusia 30 tahun. Malik telah memerintahkan mereka membawa segala harta, wanita-wanita, anak-anak dan binatang ternak bersama-sama ke medan perang. Dia mengarahkan demikian agar ia lebih mendorong mereka untuk terus berjuang. Bilangan pejuang mereka dalam pertempuran yang ditunggu-tunggu ini antara 20,000 hingga 30,000 orang. Oleh yang demikian, Rasulullah SAW mengisytiharkan keazaman Baginda untuk keluar memerangi mereka. Semua orang yang berada di Makkah turut keluar berperang. Mereka terdiri daripada para sahabat yang datang bersama Baginda dalam pembukaan Makkah dan orang-orang yang baru memeluk Islam.

A detailed illustration of a large, multi-story building under construction, with scaffolding and wooden frames visible.

Rasulullah SAW berjalan sehingga sampai ke Wadi Hunain, tiba-tiba Hawazin dan sekutu-sekutunya menyerang mereka dalam kesuraman subuh. Orang Islam telah menyerang balas menyebabkan musuh susut dan tewas. Kemudian orang Islam sibuk mengumpul harta rampasan perang. Oleh itu, orang musyrik kembali menyerang orang Islam dengan anak-anak panah sehingga ikatan barisan tentera Islam bercerai berai. Penduduk Makkah dan orang Islam yang baru memeluk Islam lari sedangkan Rasulullah s.a.w. tetap kekal bertahan di atas baghal Baginda, seraya bersabda: "Aku Nabi, tidak dusta. Aku keturunan Abdul Muttalib."

Tersebar berita angin di kalangan orang Islam bahawa Nabi SAW telah terbunuh. Kebanyakan mereka mencampakkan senjata lantaran berputus asa. Namun ada sekumpulan Muhajirin dan Ansar tetap berjuang di sekeliling Baginda. Al-Abbas (beliau seorang yang bersuara lantang) menyeru orang Islam: "Rasulullah masih hidup." Lalu orang Islam yang lari berpatah balik kepada Baginda. Bilangan mereka semakin ramai sehingga mereka mencapai kemenangan untuk kali kedua. Tentera Islam mengejar tentera musyrik, membunuh dan menawan mereka. Harta rampasan musuh amat banyak. Rasul SAW terlebih dahulu membahagi-bahagikannya kepada golongan muallaf yang baru memeluk Islam, tanpa memberi apa-apa kepada Ansor berdasarkan keimanan dan kejujuran keislaman Ansor (yang tidak perlu lagi kepada balasan habuan keduniaan terhadap pengorbanan mereka).

Ayat al-Quran telah turun berkenaan pertempuran ini:

Sesungguhnya Allah telah menolong kamu mencapai kemenangan dalam banyak medan-medan perang dan di medan perang Hunain, iaitu semasakamu merasa megah dengan sebab bilangan kamu yang ramai; maka bilangan yang ramai itu tidak mendatangkan faedah kepada kamu sedikit pun; dan (semasa kamu merasa bumi yang luas itu menjadi sempit kepada kamu; kemudian kamu berpaling undur melarikan diri. Kemudian Allah menurunkan semangat tenang tenteram kepada Rasul-Nya dan kepada orang-orang yang beriman, dan Allah menurunkan tentera yang kamu tidak melihatnya, serta Dia menyiksa orang-orang kafir itu (dengan kekalahan yang membawa kehancuran); dan yang demikian itu ialah balasan bagi orang-orang yang kafir. (Maksud surah At-Taubah: 25-26)

A detailed illustration of a group of people in traditional Islamic attire, including head coverings and long robes, standing in a line.

Peperangan ini adalah pertempuran penting yang terakhir berlaku antara Islam dan orang musyrik. Tak lama selepas itu, seluruh bangsa Arab telah memecahkan behala-behala dan memeluk agama Islam.

GHAZWAH TABUK

Ghazwah Tabuk dinamakan juga dengan Ghazwah al-'Usrah (Peperangan yang Susah). Ia berlaku pada Rajab, tahun ke-9 hijrah.

Tabuk ialah nama sebuah tempat yang terletak di antara Wadi al-Qura di bumi Hijaz dengan Syam. Sebab peperangan ini ialah, Rom telah mengumpul angkatan tentera yang ramai di Syam termasuk daripada kabilah Lakhm, Juzam, Amilah dan Ghassan yang merupakan kaum Arab beragama Nasrani. Tujuan Maharaja Rom, Herkules mengumpulkan angkatan tentera tersebut adalah untuk menyerang Madinah dan menghapuskan negara yang baru terbina disemenanjung tanah Arab tersebut. Berita-berita tentang Madinah serta siri kemenangannya menimbulkan kebimbangan dan ketakutan kepada beliau.

Rasulullah SAW mengajak orang ramai untuk keluar berperang. Waktu itu merupakan waktu amat susah dan panas. Orang-orang mukmin yang jujur menyahut seruan, tersebut dengan rela hati. Namun terdapat tiga orang yang tidak menyertai angkatan tersebut. Padahal mereka merupakan golongan beriman yang jujur. Rasul SAW juga meminta golongan berada agar membiayai keperluan ketenteraan tersebut. Lantas mereka menyumbangkan harta benda yang banyak. Abu Bakar telah menyumbang seluruh hartanya, sejumlah 40,000 dirham. Umar pula menyumbang separuh hartanya. Sementara Othman turut menyumbang harta yang banyak. Beliau telah mempersiapkan satu pertiga keperluan tentera Islam, hinggakan Rasulullah SAW mendoakan untuk beliau dengan sabdanya: "Selepas hari ini, apa-apa yang dilakukan Othman tidak akan memudaratkannya."

Beberapa orang sahabat yang miskin datang bertemu Baginda lantaran mereka tidak mempunyai tunggangan yang boleh mereka naiki. Rasulullah SAW bersabda: "Aku tidak dapat menyediakan tunggangan yang boleh membawa kamu." Oleh itu, mereka bersurai dengan air mata bergelintangan kesedihan lantaran tidak mempunyai apa-apa untuk disumbangkan. Manakala seramai lebih 80 orang munafik tidak menyertai peperangan ini. Terdapat juga segelintir Arab Badwi mengemukakan keuzuran kepada Baginda dengan alasan-alasan yang tidak benar. Walau bagaimanapun, Baginda tetap menerima alasan mereka itu.

Rasulullah SAW berangkat dengan tenteranya seramai 30,000 orang pejuang dan 10,000 ekor kuda. Ia merupakan angkatan tentera paling besar yang pernah dilihat oleh Arab ketika itu. Baginda meneruskan perjalanannya sehingga sampai ke Tabuk. Baginda bermukim di situ selama kira-kira 20 malam tanpa menghadapi sebarang tipu daya daripada musuh, mahupun peperangan. Peperangan ini merupakan Ghazwah terakhir yang disertai oleh Rasulullah SAW. Mengenai ghazwah ini, Allah Tabarak wa Taala berfirman:

لَقَدْ تَابَ اللَّهُ عَلَى النَّبِيِّ وَالْمُهَاجِرِينَ وَالْأَنْصَارِ الَّذِينَ اتَّبَعُوهُ فِي سَاعَةِ الْعُسْرَةِ مِنْ بَعْدِ مَا كَادَ يَزِيغُ قُلُوبُ فَرِيقٍ
 مِنْهُمْ ثُمَّ تَابَ عَلَيْهِمْ إِنَّهُ بِهِمْ رَءُوفٌ رَحِيمٌ ١١٧
 لَقَدْ تَابَ اللَّهُ عَلَى النَّبِيِّ وَالْمُهَاجِرِينَ وَالْأَنْصَارِ الَّذِينَ اتَّبَعُوهُ فِي سَاعَةِ الْعُسْرَةِ مِنْ بَعْدِ مَا كَادَ يَزِيغُ قُلُوبُ فَرِيقٍ
 مِنْهُمْ ثُمَّ تَابَ عَلَيْهِمْ إِنَّهُ بِهِمْ رَءُوفٌ رَحِيمٌ ١١٧ وَعَلَى الثَّلَاثَةِ الَّذِينَ خَلَفُوا حَتَّىٰ إِذَا ضَاقَتْ عَلَيْهِمُ الْأَرْضُ
 بِمَا رَحُبَتْ وَضَاقَتْ عَلَيْهِمْ أَنْفُسُهُمْ وَظَنُّوا أَنْ لَا مَلْجَأَ مِنَ اللَّهِ إِلَّا إِلَيْهِ ثُمَّ تَابَ عَلَيْهِمْ لِيَتُوبُوا ۗ إِنَّ اللَّهَ هُوَ
 الْتَوَّابُ الرَّحِيمُ ١١٨

Sesungguhnya Allah telah menerima taubat Nabi dan orang-orang Muhajirin dan Ansar yang mengikutnya (berjuang) dalam masa kesukaran, sesudah hampir-hampir terpesong hati segolongan dari mereka (daripada menurut Nabi untuk berjuang); kemudian Allah menerima taubat mereka; sesungguhnya Allah Amat Belas, lagi Maha Mengasihani terhadap mereka. Dan (Allah menerima pula taubat) tiga orang yang ditangguhkan (penerimaan taubat mereka) hingga apabila bumi yang luas ini (terasa) sempit kepada mereka (kerana mereka dipulaukan), dan hati mereka pula menjadi sempit (kerana menanggung dukacita), serta mereka yakin bahawa tidak ada tempat untuk mereka lari dari (kemurkaan) Allah melainkan (kembali bertaubat) kepada-Nya; kemudian Allah (memberi taufiq serta) menerima taubat mereka supaya mereka kekal bertaubat. Sesungguhnya Allah Dia lah Penerima taubat lagi Maha Mengasihani. (Maksud At-Taubah:117-118)

Turut diturunkan ayat-ayat yang menceritakan tentang sikap orang-orang munafik dan Arab Badwi yang meminta keuzuran agar tidak menyertai peperangan. Dalam ayat-ayat ini terdapat teguran Allah kepada Rasul-Nya yang menerima alasan mereka kita boleh menemui ayat-ayat ini dalam surah at-Taubah.

SESI KELIMA

PERISTIWA PENTING SELEPAS PEMBUKAAN MAKKAH SEHINGGA KEWAFATAN RASULULLAH SAW

1. HASIL PEMBELAJARAN:

- Menghargai kepentingan Fathul Makkah sebagai puncak kemenangan dakwah Islam di Semenanjung Arab.
- Menganalisis khutbah Haji Wada' dan pesan-pesan penting tentang kesatuan umat dan hak asasi manusia.
- Menghayati kisah-kisah penting sebelum kewafatan Rasulullah SAW dan pengajaran daripadanya.
- Memahami peristiwa kewafatan Rasulullah SAW dan impaknya terhadap umat Islam.

2. ISI KANDUNGAN UTAMA:

- Pendahuluan
- Hajjatul Wada (Haji Selamat Tinggal)
- Kisah 'Adi bin Hatim
- Kisah Nabi Menghantar Para Utusan
- Pengiriman Usama bin Zaid ke Balqa'
- Peristiwa Kewafatan Rasulullah SAW
- Penutup

HAJJATUL WADA (HAJI SELAMAT TINGGAL)

Hajjatul Wada merupakan satu-satunya haji yang dilakukan oleh Rasulullah s.a.w. selepas diutuskan sebagai Rasul. Apabila orang ramai mendengar Rasulullah s.a.w. akan mengerjakan haji pada tahun tersebut, mereka berbondong-bondong datang dari pelbagai pelusuk semenanjung tanah Arab untuk sama-sama mengerjakan haji. Hinggakan bilangan mereka (mengikut sesetengah ahli sejarah) mencapai jumlah 114 ribu orang. Bilangan ini adalah bilangan anggaran. Jika tidak, bagaimanakah mereka boleh dihitung dan ditentukan bilangan seramai itu?

Rasulullah SAW telah menyampaikan khutbah Baginda yang masyhur. Setiap penuntut wajib menghafalnya kerana ia mengandungi pengisytiharan prinsip-prinsip umum Islam, ia juga merupakan khutbah terakhir Baginda. Di dalamnya terkandung:

"Wahai manusia! Dengarlah sabdaku. Aku tidak tahu, boleh jadi aku tidak akan menemui kamu selepas tahun ini di tempat ini untuk selama-lamanya. (Ramalan ini adalah antara mukjizat Rasulullah s.a.w.). Wahai manusia! Darah dan harta kamu mesti dihormati sehingga kamu bertemu Kembali dengan Tuhan kamu. Ia mesti dihormati sebagaimana kehormatan hari kamu ini (Hari Arafah) dan kehormatan bulan kamu ini (bulan haram Zulhijjah).

Kamu akan bertemu dengan Tuhan kamu, lalu Dia akan menyoal kamu tentang amalan-amalan kamu. Sesungguhnya aku telah menyampaikan. Sesiapa yang mempunyai amanah, hendaklah dia menunaikan amanah itu kepada pemberi amanah. Semua amalan riba dihapuskan. Namun kamu berhak memiliki modal kamu tanpa kamu menzalimi atau dizalimi. Allah telah menetapkan tiada riba (lagi diamalkan). Oleh itu, semua riba kepunyaan Abbas bin Abdul Muttolib dihapuskan.

Setiap tuntutan darah pada zaman jahiliah digugurkan. Tuntutan darah pertama yang aku gugurkan ialah darah Ibnu Rabi'ah bin al-Harith bin Abdul Muttolib (dia disusukan oleh Bani Laith dan telah dibunuh oleh Huzail). Dia merupakan tuntutan darah jahiliah pertama yang aku mulakan pengguguranuntutannya.

Wahai manusia! Syaitan telah berputus asa buat selama-lamanya untuk dia disembah lagi di bumi kamu ini. Namun sekiranya dia dipatuhi dalam perkara lain yang kamu anggap lekeh, ia sudah cukup untuk menyenangkan hatinya. Oleh itu, berwaspadalah terhadap agama kamu.

Wahai manusia! Perbuatan menangguh tarikh bulan-bulan haram adalah penambahan kepada kekufuran. Orang-orang kafir menyesatkan orang ramai dengan perbuatan itu. Mereka menghalalkan bulan tersebut untuk setahun dan mengharamkannya untuk setahun yang lain dengan tujuan melakukan perkara-perkara yang Allah haramkan. Justeru itu, mereka menghalalkan perkara yang diharamkan Allah dan mengharamkan perkara yang dihalalkan Allah. Waktu telah berputar sebagaimana keadaan asalnya pada hari Allah menciptakan langit dan bumi. Bilangan bulan di sisi Allah ialah 12 bulan. Empat bulan daripadanya adalah bulan haram: tiga bulan berturut-turut dan satu lagi ialah Rajab Mudhar yang berada antara Jamadil Akhir dengan Syaaban.

Wahai manusia! Kamu mempunyai hak ke atas isteri-isteri kamu dan mereka pula mempunyai hak ke atas kamu. Hak kamu ke atas mereka ialah mereka tidak boleh membenarkan sesiapa yang tidak kamu sukai (sama ada lelaki mahupun wanita, mahram mahupun ajnabi) memasuki rumah kamu. Mereka juga tidak boleh melakukan perkara keji. Sekiranya mereka melakukannya, Allah membenarkan kamu untuk meninggalkan tidur dengan mereka dan memukul mereka dengan pukulan yang tidak keras. Sekiranya mereka berhenti daripada perbuatan-perbuatan ini, mereka berhak mendapat rezeki dan pakaian yang baik. Terimalah pesanan aku untuk berbuat baik dengan wanita ini. Mereka adalah pembantu kamu. Mereka tidak memperoleh apa-apa bagi diri mereka. Kamu mengambil mereka sebagai amanah Allah serta menghalalkan kemaluan mereka dengan kalimah Allah.

Fahamilah sabdaku ini, wahai manusia! Sesungguhnya aku telah menyampaikan. Aku telah tinggalkan kepada kamu satu perkara yang jelas, jika kamu berpegang teguh dengannya, kamu tidak akan sesat selama lamanya: Kitab Allah dan Sunnah Nabi-Nya.

Wahai manusia! Dengar dan fahamilah sabdaku. Kamu tahu bahawa setiap orang Islam saudara kepada orang Islam yang lain. Sesungguhnya orang Islam bersaudara. Milik saudaranya tidak halal bagi seseorang kecuali apa yang diberikannya dengan rela hati. Oleh itu jangan kamu menzalimi diri-diri kamu. Ya Allah, adakah aku telah menyampaikan?"

The background of the page is a large, vertical image of a mosque interior. It shows a series of arches and a large dome in the distance. In the foreground, there is a wooden structure, possibly a minbar or a part of the prayer area. The lighting is warm and the colors are earthy.

Perkara pertama yang menarik perhatian dalam peristiwa Hajjatul Wada ialah kehadiran manusia yang begitu ramai bersama Rasul s.a.w.. Mereka datang dari segala ppelusuk semenanjung tanah Arab. Mereka beriman dengan Baginda, membenarkan risalahnya serta patuh kepada arahan-nya. Sedangkan 23 tahun sebelum itu, mereka semuanya berpegang kepada keberhalaan dan syirik. Mereka mengingkari prinsip-prinsip risalah Baginda dan merasa pelik dengan seruan tauhid yang disampaikan oleh Baginda.

Mereka juga menjauhkan diri daripada kritikan Baginda terhadap nenek moyang mereka yang menyembah berhala, juga hujah Baginda memperbodohkan khayalan mereka. Bahkan ramai antara mereka yang menentang dan menunggu-nunggu masa untuk bertindak kepada Baginda. Bahkan mereka merancang untuk membunuh, mempersiapkan angkatan untuk menyerang dan bertarung dengan Baginda menggunakan pedang juga lembing.

Bagaimanakah revolusi perubahan yang mengagumkan ini berlaku dalam tempoh sesingkat ini? Bagaimanakah Rasulullah s.a.w. dapat menukar kelompok manusia yang ramai ini daripada pegangan keberhalaan, jahiliah, kerosakan dan perpecahan kepada mentauhidkan Allah, mengenali zat dan sifat-Nya, bersatu padu dan mempunyai satu objektif juga matlamat? Bagaimana mereka boleh mencintai Baginda sedangkan sebelum ini mereka memusuhi, kuat menentang dan terus bertelingkah dengan Baginda?

Seorang manusia, walau sepintar, selicik dan sehebat mana peribadinya, adalah mustahil dia mampu mencapai perubahan ini dalam masa ratusan tahun. Kita tidak pernah mendengar fenomena sebegini pada umat terdahulu mahupun kini. Perubahan ini pasti disebabkan oleh kebenaran risalah, sokongan langit, pertolongan Allah dan mukjizat agama yang syumul lagi sempurna. Agama ini dijadikan sebagai penyempurnaan nikmat Allah ke atas hamba-hamba-Nya dan penutup risalah-Nya kepada manusia. Allah menghendaki agama ini berperanan menghentikan kesengsaraan umat yang sesat di celah lorong-lorong kehidupan, juga yang hina kerana hawa nafsu dan sentimen 'asobiyyah. Dia juga mahu menunjukkan mereka jalan hidayah dan membuka mata mereka kepada cahaya kebenaran.

Dia ingin melantik mereka sebagai pemimpin bangsa-bangsa dan perubah perjalanan sejarah. Dia juga mahu mereka menghapuskan kehinaan manusia, seterusnya mewariskan kepada mereka, hikmah dan Kitab yang menjadi petunjuk dan peringatan kepada orang-orang yang berakal. Seratus empat belas ribu orang manusia yang sebelumnya mendustai, memerangi, membenci dan memberontak terhadap Baginda, bertukar menjadi mereka yang mempercayai, mematuhi,

mencintai dan mentaati Baginda. Semua itu dalam tempoh 23 tahun. Ini adalah perbuatan Allah Yang Maha Benar lagi Maha Nyata. Maha suci Allah daripada apa yang mereka sekutukan. Maha suci zat Rasul-Nya daripada apa yang dikatakan oleh para atheis. Maha Suci Tuhan kamu, Tuhan Yang Maha Mulia daripada apa yang mereka sifatkan. Selamat ke atas para rasul dan segala puji bagi Allah Tuhan sekalian alam.

Perkara kedua yang menarik perhatian dalam peristiwa hajjatul Wada ini ialah khutbah yang bertenaga lagi jitu yang disampaikan oleh Rasulullah SAW kepada semua manusia. Begitu juga dengan pengisytiharan prinsip-prinsip selepas sempurna risalah dan kepimpinan Baginda. Ia merupakan penegasan terhadap prinsip-prinsip yang diisytiharkan sejak permulaan dakwahnya. Iaitu ketika Baginda masih keseorangan, ditindas, sedikit dan lemah. Ia adalah prinsip yang tetap dan tidak berubah, sama ada ketika sedikit mahupun ramai, ketika perang mahupun aman, kalah mahupun menang, dunia menentang mahupun menerimanya, musuh kuat mahupun lemah.

Sedangkan kita mengetahui terdapat di kalangan pemimpin-pemimpin dunia, mereka yang berbolak balik dalam pegangan akidah dan prinsip. Pegangan mereka bercanggah ketika lemah dan ketika kuat. Cara dan objektif mereka pula berubah-ubah. Mereka menyatakan sesuatu yang bertentangan dengan apa yang mereka sembunyikan dalam diri. Mereka juga mengajak kepada perkara yang mereka tidak percayai. Mereka memakai pakaian pendeta ketika lemah dan kulit serigala ketika kuat.

Fenomena ini adalah kerana mereka itu "rasul" kepada maslahat, sedangkan para Nabi adalah rasul kepada Allah. Amat jauh beza antara mereka yang mengerumuni bangkai busuk dengan mereka yang berenang dalam lautan cahaya petunjuk. Begitu juga terlalu jauh beza mereka yang bekerja untuk diri sendiri dengan mereka yang bekerja untuk kemanusiaan. Juga amat jauh beza antara penyokong-penyokong syaitan dengan penyokong-penyokong Tuhan ar-Rahman. Allah Pelindung (Yang mengawal dan menolong) orang-orang yang beriman. Dia mengeluarkan mereka dari kegelapan (kufur) kepada cahaya (iman). Dan orang-orang yang kafir, penolong-penolong mereka ialah taghut yang mengeluarkan mereka dari cahaya (iman) kepada kegelapan (kufur). Mereka itulah ahli neraka, mereka kekal di dalamnya. (Al-Baqarah: 257)

PERISTIWA PENTING SEBELUM KEWAFATAN RASULULLAH

Kisah Adi bin Hatim

Adi bin Hatim, anak kepada Hatim yang terkenal dengan sangat pemurah, beliau adalah seorang Kristian yang sangat dihormati oleh kaumnya. Beliau berhak mengambil satu perempat daripada harta rampasan perang yang berjaya dirampas oleh kaumnya (tradisi yang berlaku dalam kalangan orang-orang Arab pada waktu itu). Selepas mendengar dakwah Rasulullah SAW, dia tidak menyukai dakwah Rasulullah SAW dan meninggalkan kaumnya kemudian bergabung dengan orang-orang Kristian di Syam.

Adi menceritakan kisahnya: Kemudian aku lebih membenci keberadaanku di sana berbanding kebencianku kepada Rasulullah SAW, lalu aku putuskan lebih baik aku pergi menemuinya. Jika dia seorang raja atau pendusta, pasti aku dapat mengetahuinya dan jika dia seorang yang benar (Nabi) maka aku harus mengikutinya.

Kemudian aku berangkat hingga aku berada di hadapan Rasulullah SAW di Madinah. Aku menemui baginda ketika baginda berada di masjidnya lalu aku ucapkan salam kepadanya. Baginda bertanya: "Siapa anda?" Aku jawab: "Adi bin Hatim!" Rasulullah SAW kemudian berdiri dan membawaku ke rumahnya. Demi Allah, ketika baginda membawaku ke rumah tiba-tiba ada seorang perempuan tua dan lemah yang menghalang baginda kemudian baginda pun berhenti lama sekali kepada wanita yang mengajukan keperluannya kepada baginda itu. Menyaksikan hal ini aku berkata di dalam hati: "Demi Allah, ini bukan gaya seorang raja." Selepas itu, Rasulullah SAW berjalan lagi membawaku. Ketika membawaku masuk ke dalam rumahnya, baginda mengambil sebuah bantal daripada kulit yang sangat sederhana kemudian menyerahkannya kepadaku seraya berkata: "Duduklah di atasnya!" Aku jawab: "Anda sajalah!" Kemudian aku pun duduk di atas bantal itu sedangkan baginda sendiri duduk di atas tanah.

Di dalam hati aku berkata: "Demi Allah, ini bukan perilaku seorang raja." Kemudian baginda berkata: "Wahai 'Adi bin Hatim, adakah engkau mengetahui tuhan selain Allah?" Aku menjawab: "Tidak." Baginda bertanya lagi: "Bukankah engkau seorang yang beragama?" Aku menjawab: "Ya, benar." Baginda bertanya lagi: "Bukankah engkau mendapat satu perempat harta rampasan perang yang diperoleh kaummu?" Aku menjawab: "Ya, benar." Baginda kemudian mengulas: "Demi Allah, sesungguhnya hal itu tidak dihalalkan oleh agamamu." Aku menjawab: "Memang dilarang."

Selanjutnya baginda berkata: "Wahai 'Adi bin Hatim, mungkin engkau enggan memeluk agama ini (Islam) kerana melihat kemiskinan penganutnya. Demi Allah, tidak lama lagi harta kekayaan akan berlimpah ruah kepada mereka (kaum Muslim) sehingga tiada lagi orang yang mahu mengambilnya. Mungkin engkau masih enggan memeluk agama ini kerana banyaknya musuh mereka dan sedikitnya jumlah mereka. Demi Allah, tidak lama lagi engkau akan mendengar seorang wanita yang pergi dari Qadisiah menunggang untanya ke rumah ini tanpa rasa takut. Mungkin engkau masih enggan memeluk agama ini kerana kerajaan dan kekuasaan masih berada di tangan orang-orang selain mereka. Demi Allah, tidak lama lagi engkau akan mendengar tentang istana-istana putih dari Babilonia jatuh ke tangan mereka (kaum Muslimin)."

'Adi berkata: "Kemudian aku pun memeluk Islam."

Adi berkata lagi: "Kemudian aku telah menyaksikan dua perkara yang disebutkan Rasulullah SAW di atas: Wanita yang pergi dari Qadisiah ke Madinah sendirian tanpa rasa takut, sebagaimana yang diramalkan Nabi SAW, dan aku sendiri turut serta dalam pasukan pertama yang menyerbu dan merampas harta kekayaan Kiswa. Aku bersumpah kepada Allah, perkara ketiga yang dijanjikan Nabi SAW pasti akan terbukti."

Pelajaran dan Renungan:

Para pembaca boleh melihat keperibadian Rasulullah SAW di hadapan Adi ibn Hatim. Baginda berwibawa dan jelas. Baginda sama sekali tidak menunjukkan diri sebagai penguasa yang sombong. Baginda menunjukkan diri sebagai utusan Allah bagi seluruh manusia. Inilah asas munculnya keimanan Adi ibn Hatim.

Oleh itu, kita patut memperhatikan perkara yang telah disaksikan oleh Adi ibn Hatim. Selain itu, kita juga hendaklah mengambil pengajaran, sebagaimana yang dipetik oleh Adi ibn Hatim. Dengan berbuat demikian, keimanan kita terhadap kenabian Muhammad SAW akan semakin bertambah. Perhatikanlah sejenak,

keperibadian Rasulullah SAW yang dilukiskan oleh Adi ibn Hatim. Kerana beliau menyaksikan sendiri, timbullah kesan dalam dirinya. Dari situlah muncul keimanannya.

Adi ibn Hatim berkata, "Demi Allah, baginda benar-benar mengajak saya ke rumahnya. Tiba-tiba seorang wanita lemah dan tua menemui baginda. Wanita itu meminta Rasulullah SAW berhenti. Baginda pun berhenti di hadapannya. Cukup lama baginda di situ, kerana wanita tersebut berbicara panjang lebar mengenai keperluannya. Saya berkata dalam hati, 'Demi Allah, raja seperti apakah ini?'"

Memang benar, penguasa pada umumnya tamak, gila kuasa, dan ingin sekali dihormati. Kesabaran mereka amat tipis dan cepat bosan. Bagaimana pula dengan Rasulullah SAW? Tabiat baginda begitu mengagumkan dalam setiap keadaan. Perhatikan sikap baginda di tengah-tengah para sahabatnya, seperti ketika baginda berada di tengah majlisnya. Taraf hidup baginda tidak pernah beranjak dari golongan orang-orang fakir dan miskin. Sehingga berpisah dengan dunia dan bertemu Allah SWT, baginda tetap miskin. Bagaimana mungkin? Bukankah baginda boleh memiliki kekayaan melimpah, dan tidak seorang pun boleh menandinginya? Akan tetapi, baginda merasa cukup dengan gelaran kenabian yang disandangnya. Kerana kenabian inilah Allah memuliakannya.

Selanjutnya, kami meneruskan perjalanan dan sampai di rumah. Kami pun masuk. Baginda mencari sebuah bantal, lalu memberikannya kepada saya sambil bersabda, "Duduklah!"

Saya menjawab, "Bagaimana dengan tuan? Tuan saja yang duduk di atasnya."

Baginda bersabda, "Engkau lebih utama." Saya pun duduk di atas bantal yang disediakan baginda, sedangkan baginda duduk tanpa alas apa pun.

Saya berkata dalam hati, "Demi Allah, raja seperti apakah ini?"

Adi ibn Hatim merupakan orang terpandang di kaumnya. Beliau mengira akan menemukan sesuatu yang berharga di rumah Rasulullah SAW. Namun, beliau dikejutkan oleh pemandangan sebaliknya. Beliau menyaksikan sendiri Rasulullah SAW duduk tanpa alas. Ternyata, Rasulullah SAW kebenaran dan keimanan, meskipun jalan yang harus ditempuh berat dan berliku.

Berbeza jika kebebasan berfikir dan kejernihan akal telah hilang, digantikan dengan kedengkian dan hawa nafsu yang menguasai diri. Bila ini berlaku, maka kebatilan menjadi pilihan dan kejahatan menjadi teman setia.

Nabi Menghantar Para Utusan

Sebagaimana para utusan datang menemui Rasulullah SAW untuk menyatakan keislaman mereka, demikian pula sebaliknya Rasulullah SAW menghantar beberapa utusan ke pelbagai penjuru, terutamanya ke bahagian selatan Jazirah Arab, untuk mengajarkan prinsip-prinsip dan hukum-hukum Islam kepada manusia. Islam telah tersebar ke seluruh jazirah sehingga sangat diperlukan para muallim dan mursyid yang dapat menjelaskan hakikat ajaran Islam kepada manusia.

Rasulullah SAW menghantar Khalid bin Walid ke Najran untuk mengajak penduduknya kepada Islam dan mengajarkan prinsip-prinsipnya kepada mereka. Nabi SAW juga menghantar Ali RA ke Yaman untuk misi yang sama. Di samping itu, Rasulullah SAW juga menghantar Abu Musa al-Asy'ari dan Mu'adz bin Jabal ke Yaman. Masing-masing utusan pergi ke pelosok negeri Yaman. Kepada kedua-dua utusan ini, Nabi SAW berwasiat:

"Permudahkan dan jangan mempersulit! Gemarkan dan jangan membuat orang lari, berusahalah dengan penuh keikhlasan dan kekuatan."

Di dalam Musnad Imam Ahmad disebutkan bahawa Nabi SAW keluar bersama Mu'adz ke pintu gerbang kota Madinah dengan berjalan kaki, sedangkan Mu'adz menunggang kenderaannya. Kemudian baginda berwasiat kepadanya:

"Wahai Mu'adz, mungkin engkau tidak akan menemui aku lagi selepas tahun ini! Mungkin engkau akan melewati masjidku dan kuburanku (juga)."

Setelah itu, Mu'adz berlinangan air mata kerana terpaksa berpisah dengan Rasulullah SAW. Beliau terus menetap di Yaman sehingga selepas kewafatan Baginda Rasulullah SAW. Apa yang telah diramalkan oleh Rasulullah SAW kepada Mu'adz akhirnya menjadi kenyataan.

Pengiriman Usamah bin Zaid ke Balqa'

Usaha terakhir Rasulullah SAW ialah mempersiapkan satu angkatan tentera ke Syam di bawah pimpinan Usamah bin Zaid bagi menyebarkan dan mempertahankan dakwah. Ia juga merupakan usaha menghalang serangan penceroboh dan tindakan proaktif untuk berhadapan dengan musuh yang menunggu-nunggu peluang menyerang negara Islam yang baru ditegakkan.

Baginda memerintahkan beliau untuk menginjakkan kaki di sempadan al-Balqa'dan ad-Darum di bumi Palestin. Angkatan tentera tersebut terdiri daripada golongan Muhajirin, Ansor dan orang Islam yang tinggal di sekeliling Madinah. Tiada seorang pun yang terkecuali.

Ketika angkatan tersebut berkumpul di Madinah bersedia untuk berangkat, Rasulullah SAW mula jatuh sakit; Sakit yang berakhir dengan kewafatan Baginda. Oleh itu, bala tentera tersebut menangguhkan perjalanan mereka kerana menunggu sehingga Rasulullah SAW sembuh.

Mereka juga ingin mendapat saranan dan petunjuk Baginda. Namun beberapa hari selepas itu Rasulullah SAW wafat. Allah SWT telah memilih Baginda untuk kembali ke pangkuan-Nya. Iaitu setelah Baginda menunaikan amanat, menyampaikan risalah dan mempersiapkan seluruh semenanjung tanah Arab untuk membawa panji-panji Islam. Mereka telah bersedia untuk menyebarkan peradaban dan ajarannya ke segenap ceruk bumi. Ketika itu tentera Islam juga telah mampu untuk memikul beban amanah yang membawa impak besar kepada sejarah.

Baginda diwafatkan selepas tersedia anggota tentera yang layak untuk mengharungi siri pertempuran demi amanah tersebut. Para panglima berkaliber untuk memimpin peperangan dan tokoh-tokoh agung lagi soleh untuk menguruskan negara telah berjaya dilahirkan.

Selawat dan salam Allah ke atas Rasul-Nya. Semoga Allah membalas Baginda dengan sebaik-baik balasan bagi pihak kita dan kemanusiaan. Jika bukan kerana Baginda dan tenteranya yang setia, jika bukan kerana tenteranya menunaikan amanah selepas Baginda, nescaya sekarang ini kita berada dalam kesesatan yang nyata. Allah telah memuliakan Rasul-Nya dengan kemuliaan yang tidak pernah diberikan kepada para Nabi sebelum Baginda. Usia Baginda dipanjangkan sehingga Baginda dapat menyaksikan hasil dakwah dan perjuangannya meliputi seluruh semenanjung tanah Arab. Dakwah Baginda membersihkan bumi Arab daripada berhala untuk selama-lamanya. Dakwah Baginda juga menjadikan

mereka yang meruntuhkan berhala dengan tangan-tangan mereka sendiri merasa gembira dengan nikmat Allah yang telah menyelamatkan mereka daripada kesesatan. Padahal merekalah yang menyembah, sujud dan memohon pendampingan dengan berhala tersebut.

Baginda juga membentuk mereka agar bersedia menjelajah muka bumi membawa cahaya petunjuk yang dikurniakan Allah kepada mereka untuk manusia. Generasi yang menyembah dan mempertuhankan berhala. Hidup semasa jahiliah dalam keadaan alpa di samping memiliki keupayaan dan bakat yang tidak tersusun. Kemudian generasi inilah yang bertindak memecahkan berhala dan membangunkan negara Arab yang pertama dalam keseluruhan sejarah Arab.

Negara yang ditegakkan tersebut berperanan memikul risalah, menggariskan objektif dan bertindak sebagai guru juga penyelamat kepada bangsa lain di sekelilingnya. Mereka merupakan peneroka yang bangga dengan petunjuk, cahaya dan kebaikan yang dibawa. Mereka bersimpati dengan kejahilan, kegelapan dan keruntuhan yang dialami oleh bangsa-bangsa lain. Sedangkan sebelum ini, Arab kagum dan mengagungkan bangsa-bangsa tersebut. Bahkan mereka tunduk kepada mereka dalam politik, pemikiran dan sosial. Ini merupakan peristiwa yang unik dalam sejarah dahulu mahupun moden. Pengutusan Usamah merupakan simbol kepada peristiwa tersebut dan hasil produk risalah yang bertuah lagi berkat ini.

Selanjutnya, Rasulullah SAW telah melantik Usamah bin Zaid memimpin Angkatan tentera tersebut padahal beliau adalah seorang remaja berusia 20 tahun. Di bawah kepimpinannya terdapat tokoh veteran Muhajirin dan Ansor seperti Abu Bakar, Umar, Othman, Ali dan lain-lain tokoh yang terlebih dahulu memeluk Islam dan telah terbukti keperwiraan mereka. Mereka juga lebih tua dan berkedudukan berbanding Usamah.

Tindakan Rasulullah ini mempamerkan salah satu sunnah Islam yang terpuji. Ia memansuhkan perbezaan antara manusia yang berdasarkan kemegahan, usia dan jasa. Ia juga mengutamakan keupayaan yang baik tanpa mengira usia dan kedudukannya. Seterusnya, sejarah telah mengesahkan bahawa ia tidak pernah melahirkan tokoh yang agung dan berkaliber seperti tokoh-tokoh agung ini. Namun mereka redha untuk berada di bawah kepimpinan Usamah yang muda belia. Ini menunjukkan sejauh mana tahap pengasuhan jiwa dan akhlak yang telah mereka capai, hasil daripada usaha, petunjuk, didikan dan tunjuk ajar Rasulullah SAW. Melantik Usamah menjadi ketua kepada tokoh-tokoh seperti Abu Bakar, Umar, Othman dan Ali merupakan peristiwa besar yang tak pernah dialami oleh mana-mana bangsa. Ia merupakan sejarah pertama yang menunjukkan kewajipan

membuka ruang kepada keupayaan dan kepintaran para remaja, juga kewajipan membenarkan mereka memimpin urusan-urusan jika mereka berkecayaan. Sekiranya orang Islam selepas itu sentiasa mengingati pengajaran besar ini, nescaya bencana dan mala petaka akan lenyap daripada sejarah Islam. Begitu juga keributan dan fitnah yang mengganggu gugat tiang negara Islam dan melemahkan kekuatannya akan hilang. Alangkah bijaknyanya tindakan Rasulullah yang disokong oleh wahyu langit.

Baginda juga dikurniakan kebijaksanaan, pendapat yang tepat, pandangan yang jauh dan kemampuan politik yang hebat. Keistimewaan ini tidak diberikan kepada para nabi sebelum Baginda. Ia juga tidak diketahui terdapat pada mana-mana tokoh besar sejarah sebelum dan selepas Baginda. Semoga Allah meredhai Usamah yang masih muda belia. Tahniah kepada beliau kerana mendapat kepercayaan Rasulullah berkenaan keupayaannya untuk memimpin, kejujuran azamnya dan keislamannya yang baik. Tahniah sekali lagi kepada beliau kerana telah dijadikan Baginda sebagai contoh teladan kepada remaja-remaja kita yang beriman lagi beramal.

PERISTIWA KEWAFATAN RASULULLAH SAW

Rasulullah SAW wafat setelah Baginda mengetahui ajalnya telah hampir melalui jalan wahyu. Baginda mengucapkan selamat tinggal kepada orang ramai pada Hajjatul Wada'. Hati-hati para sahabat berdebar-debar, gelisah dan bimbang sekiranya ajal Baginda telah hampir. Namun apabila ajal yang ditetapkan oleh Allah datang, ia tidak dapat ditangguhkan.

Apabila berita kewafatan Rasul SAW tersebar, semua para sahabat menjadi kacau bilau kerana tragedi yang dahsyat itu. Madinah bergegar hebat. Ramai para sahabat yang besar dan mereka yang terdahulu memeluk Islam hilang kewarasan akalnya. Ada di kalangan mereka yang lidahnya kelu. Ada yang jatuh lumpuh tak berdaya bergerak. Ada pula (iaitu Umar) yang menghunus pedangnya seraya melarang orang ramai mengatakan Rasulullah SAW telah wafat. Beliau mendakwa Baginda sekadar koma dan akan kembali semula kepada mereka.

Hanya Abu Bakar seorang sahaja yang masih teguh jiwanya. Beliau masuk menziarahi Rasulullah s.a.w. sedang Baginda kaku diselubungi (selimut) di atas katilnya. Beliau lantas mengucupi Baginda seraya berkata: "Aku tebus kamu dengan bapa dan ibuku, wahai Rasulullah! Alangkah eloknyanya kamu ketika hidup

mahupun mati! Kematian yang Allah suratkan kepadamu telah kamu rasai. Kamu tidak akan ditimpa kematian lagi selepas ini untuk selama-lamanya. Wahai Rasulullah, ingatilah kami di sisi Tuhanmu." Kemudian Abu Bakar keluar menemui orang ramai. Beliau berucap kepada mereka seraya berkata: "Wahai manusia! Sesiapa yang menyembah Muhammad. Muhammad telah mati. Sesiapa yang menyembah Allah, sesungguhnya Allah Maha Hidup dan tidak mati." Kemudian dia membacakan firman Allah:

وَمَا مُحَمَّدٌ إِلَّا رَسُولٌ قَدْ خَلَتْ مِنْ قَبْلِهِ الرُّسُلُ أَفَإِنْ مَاتَ أَوْ قُتِلَ انْقَلَبْتُمْ عَلَى أَعْقَابِكُمْ ۚ وَمَنْ يَنْقَلِبْ عَلَى عَقْبَيْهِ فَلَنْ يَضُرَّ اللَّهَ شَيْئًا ۚ وَسَيَجْزِي اللَّهُ الشَّاكِرِينَ

Dan Muhammad itu tidak lain hanyalah seorang Rasul yang sudah pundi dahului oleh beberapa orang Rasul (yang telah mati atau terbunuh). Jikalau demikian, kalau dia pula mati atau terbunuh, (patutkah) kamu berbalik (berpaling tadah menjadi kafir)? Dan (ingatlah), sesiapa yang berbalik (menjadi kafir) maka dia tidak akan mendatangkan mudarat kepada Allah sedikitpun; dan (sebaliknya) Allah akan memberi balasan pahala kepada orang-orang yang bersyukur (akan nikmat Islam yang tidak ada bandingannya itu). (Ali Imran: 144)

Apabila Abu Bakar membaca ayat al-Quran tersebut, mereka tersedar daripada kejutan yang dahsyat itu. Mereka seolah-olah tidak pernah mendengar ayat tersebut sebelum itu. Kata Abu Hurairah: Umar berkata:

"Demi Allah, tidak terlintas firman Allah yang demikian melainkan apabila aku mendengar Abu Bakar membacanya. Lantas aku terkejut dan kebingungan sehingga aku terduduk ke bumi kerana kedua kaki ku tidak berdaya menanggungku. Ketika itu aku tahu bahawa Rasulullah SAW telah meninggal."

Terdapat dua pengajaran yang cukup mendalam di sini:


Pertama: Para sahabat terkejut dengan kematian Rasulullah SAW hingga seolah-olah kematian tidak mungkin berlaku kepada Baginda. Padahal kematian itu penghujung kepada setiap kehidupan. Fenomena ini berlaku kerana mereka amat mencintai Rasulullah SAW. Cinta mereka itu menyerap ke dalam darah dan urat saraf mereka. Kehebatan kejutan kerana kehilangan kekasih adalah mengikut kadar kecintaan tersebut. Kita lihat orang yang kehilangan anak atau bapa, masih tidak mempercayai dia telah kehilangannya berhari-hari lamanya. Adakah cinta di dunia ini yang mencapai kehebatan cinta para sahabat yang baik ini kepada Rasulullah SAW? Allah telah memberi petunjuk kepada mereka melalui Baginda.

Baginda juga telah menyelamatkan mereka daripada kegelapan kesesatan kepada cahaya kebenaran, mengubah kehidupan mereka, membuka pemikiran dan pandangan mereka, serta mengangkat mereka ke tahap tokoh pemimpin yang agung. Selanjutnya lagi, Baginda juga berperanan sebagai pendidik, hakim dan pemberi panduan kepada mereka. Mereka merujuk kepadanya ketika malapetaka, meminta panduan ketika berhadapan dengan peristiwa-peristiwa dan mengambil



firman Allah untuk mereka melalui Baginda. Mereka juga mengambil hadis-hadis dan pengajaran Baginda untuk mereka. Apabila Rasulullah SAW wafat, semua ini telah terputus. Kejutan apakah lagi yang lebih hebat dan dahsyat daripada kejutan ini?

Kedua: Pendirian Abu Bakar menunjukkan beliau seorang yang memiliki jiwa yang teguh dan bersemangat waja ketika berhadapan dengan malapetaka. Kriteria ini tidak dimiliki oleh sahabat lain. Ini menjadikan beliau orang yang paling layak untuk menggantikan Rasulullah SAW. Sifat ini juga terbukti ketika beliau menangani gerakan murtad di Semenanjung Tanah Arab.



Antara senarai rujukan termasuklah:

1. Fikih Sirah (Terjemahan *فقه السيرة*) oleh Dr. Sa'id Muhammad Ramadhan al-Buti, diterjemahkan oleh Dr. Lutfi Fathullah, Indonesia.
2. Sirah Nabi Muhammad SAW, Pedoman dan Pengajaran, Dr. Mustafa al Siba'ie (Terjemahan).
3. Sirah Nabawiyyah Ibnu Hisyam (Terjemahan).
4. Muhammad Rasulullah The Apostle of Mercy, Syeikh Abu Hasan Ali al-Nadwi, translated by Mohiuddin Ahmad.
5. The Noble Lif of Prophet, Dr. Ali Muhammad Al Sallabi, translated by Faisal Syafeeq.
6. مصادر السيرة النبوة وتقويمها، الدكتور فاروق حمادة
7. السيرة النبوية، لأبي حسن علي الندوي
8. السيرة النبوة، عرض الوقائع والأحداث، للدكتور علي محمد الصلابي
9. فقه السيرة النبوية مع موجز لتاريخ الخلافة الراشدة، للدكتور سعيد محمد رمضان البوطي